

廣弘明集

冊八



廣弘明集悔罪篇序

唐終南山釋道宣撰

夫福曰富饒罪稱摧折富則近生四趣厚報榮祿滿於目前遠則三聖勝相資用豐於羣有至於罪也返此殊途良由沈重貪瞋能獲果登苦楚所以罪業綿亘勞歷聖凡凡惟罪聚不足討論綸網正行事該小學致使須斯二果尙弊於怒癡羅漢漏盡猶遭於碎體是知無始故業逐分段而追徵有爲積障望變易而迴首自古正聖開喻滋彰時張四惑乃三三九品欲使隨念翦撲豈得縱以燎原然以煩惱增繁難爲禁制勃起忽忘早樹根基過結已成追悔無已但以諸佛太慈善權方便啓疎往咎導引精靈因立悔罪之儀布以自新之道旣往難復覆水之喻可知來過易收捕浣之方須列遂有普賢藥上之偈分衢而廣斯塵道安慧遠之傳命駕而行茲術至於侯王宰伯

咸仰宗科清信士女無虧誠約昔南齊司徒竟陵王制布薩法淨行

儀其類備詳如別所顯今以紙墨易繁略列數四開明悔過之宗轄焉

大略曰高僧長壽師... 經書... 聖德... 大略曰高僧長壽師... 經書... 聖德... 大略曰高僧長壽師... 經書... 聖德...

廣弘明集卷第三十六

唐終南山釋道宣集

悔罪篇第九

謝勅爲建涅槃懺啓

梁簡文帝

臣綱啓伏聞勅旨垂爲臣於同泰寺瑞應殿建涅槃懺臣障雜多災  
身穢饒疾鍼艾湯液每躪天覽重蒙曲慈降斯大福冀慧雨微垂卽  
滅身火梵風纔起私得清涼無事非恩伏枕何答不任下情謹奉啓  
謝聞謹啓此無所謝也越勅

六根懺文

今日此衆誠心懺悔六根障業眼識無明易傾朱紫一隨浮染則千  
紀莫歸雖復天肉異根法慧殊美故因見前境隨事起惡今願捨此  
肉眸俱瞬佛眼如抉目王見淨名方丈之室多寶踊塔之瑞牟尼驚  
嶽之光彌勒龍華之始常遊淨土永步天宮耳根闍鈍多種衆惡悅

染絲歌聞勝法善音昏然欲睡聽鄭衛淫靡聳身側耳知勝善之事  
樂之者希淫靡之聲欣之者衆願捨此穢耳得彼天聰聞開塔關鑰  
之聲彈指警效之響諸佛所說悉皆總持香風淨土之聲寶樹鏗鏘  
之響於一念中恍然入悟鼻根過患彌復頑嚚耽染六蘭流連百和  
鬱金易著瞻蔔難排雖復一薰一蕕叶性難遣空中海上彌不自覺  
至如雕爐在彼翠霧飛煙識染相牽彌生織累所以蚍蜉甘帶自謂  
馨香烏鴉嗜鼠不疑穢惡今願捨此鼻根得彼天受振裳躡步跨梅  
檀之迴林提囊拭鉢捧香積之寶飯長離穢濁永保清升舌根障重  
染惡尤深毒刺爭興惡虵競起既貪五黃六禽之旨又甘九鼎八珍  
之味所以焚山破卵涸水枯鱗龜隤不斟有染指之過羊羹不及致  
入陣之苦雖復鷓臍鹿胃猶不稱甘鳳肺龍胎更云不美雖羅鼎俎  
未必皆嘗在彼衆生於命已酷或復間朋亂友破俗傷真變紫奪朱  
反白爲黑所以讒言三至曾母投杼端木一說越霸吳亡故知三寸

之舌未易可掉駟馬既出於事難追願斷煩惑入清淨境既同阿難  
乞乳之譏又等淨名寂默之致餐禪悅之六味服法喜之三德形恭  
心到永趣菩提身根頑觸唯貪細軟質體塵礙不重戈矛莫不愛我  
輕他陵人傲物縱此裸蟲不羈醉象六塵四倒自此而生五蓋十纏  
因斯而致所以象簞清潤遨遊於夏室重衾狐白溫煦於冬房結駟  
廣廈動靜必安蠲首翠樓去來有託所以三業之過出自機關四大  
假成豈有真我願捨此畫瓶得彼金色淨寶珠之法飾照瑠璃之慧  
體長歸五分永等十身意識攀緣其罪山積險同夢幻譬若猴猿懸  
鏡高堂一念難靜走丸索上百慮先馳至如二十五有紛繞不息九  
十八使驚鶩無已所以灰心滅智行拔於三乘風禪露飲道高於六  
度今願斷此意根祛累斯盡心當恬怕洞照無生一切衆罪悉滅俗  
門三界異途歸之真域懺悔已竟誠心作禮

悔高慢文

弟子蕭綱又重至心歸依三寶竊聞禮稱弗傲表洙泗之遺文經云  
不慢驗踰闈之妙典故一遇恆神陵伽尙生餘習上賓天帝淮南猶  
有誤辭亦有才曰隱淪調唯高俗猶足坐癘晉君立前齊主況復道  
隆三學法兼五衆如過前殿似出北門而不密室致恭遺弓接足敢  
藉勝緣願起弘誓從今日始乃至菩提於諸出家悉表虔敬方欲削  
除七慢折制六根賓頭下步庶無厥咎耆達棄車方思景慕幽顯大  
衆咸爲證明

### 懺悔文

沈約

弟子沈約稽首上白諸佛衆聖約自今生已前至於無始罪業參差  
固非詞象所算識昧往緣莫由證舉爰始成童有心嗜慾不識慈悲  
莫辨罪報以爲毛羣鮪品事允庖廚無對之緣非惻隱所及晨剝暮  
爓巨月隨年嗛腹填虛非斯莫可兼曩昔蒙稚精靈靡達遨戲之間  
恣行天暴蠢動飛沈罔非登俎儻想逢值橫加剿撲却數追念種彙



實蕃遠憶想間難或詳盡又暑月寢臥蚊蚋嗜膚忿之於心應之於手歲所殲殞略盈萬計手因怒運命因手傾爲殺之道事無不足迄至於今猶未頓免又嘗竭水而漁躬事網罟牽驅士卒歡娛賞會若斯等輩衆夥非一黨隸賓遊愆眚交互或盜人園實或偷人芻豢弱性蒙心隨喜讚悅受分吞臧皎然不昧性愛墳典苟得忘廉取非其有卷將二百又綺語者衆源條繁廣假妄之愆雖免大過微觸細犯亦難備陳又追尋少年血氣方壯習累所纏事難排豁淇水上宮誠無云幾分桃斷袖亦足稱多此實生死牢穽未易洗拔灌志慘舒性所同稟遷怒過嗔有時或然厲色嚴聲無日可免又言謔行止曾不尋研觸過斯發動淪無紀終朝紛擾薄暮不休來果昏頑將由此作前念甫謝後念復興尺波不息寸陰驟往愧悔攢心罔知云厝今於十方三世諸佛前見在衆僧大衆前誓心剋己追自悔責收遜前愆洗濯今慮校身諸失歸命天尊又尋七尺所本八微是構析而離之

莫知其主雖造業者身身隨念滅而念念相生離續無已往所行惡造既由心行惡之時其心既染既染之心雖與念滅往之所染卽成後緣若不本諸真諦以空滅有則染心之累不卒可磨今者興此愧悔磨昔所染所染得除卽空成性其性既空庶罪無所託布髮頂禮幽顯證成此念一成相續不斷日磨歲瑩生生不休迄至道場無復退轉又彼惡加我皆由我昔加人若不滅此重緣則來惡彌邁當今斷絕永息來緣道無不在有來斯應庶達今誠要之咸達

羣臣請陳武帝懺文

陳江總

某位某甲稽首和南十方三世一切諸佛十方三世一切尊法十方三世一切賢聖見前大德僧皇帝某菩薩睿哲聰明廣淵齊聖心若虛空照窮般若發弘大誓荷負衆生神道會昌膺茲景業百王旣季運屬艱難五嶽維塵六軍日動劬勞在念有切皇心旣而深悟苦空極信無我寶臺華柱本非寶錄賊城樓櫓苦具茲多遂坐道場靜居

禪室堅固善本具足檀那石壁山河珍車象馬頭目髓腦妻子國城  
鑾輅龍章翠帳玉機福德所感威惠所及莫不肅然大捨供養三尊  
便欲拂衣崆峒高步六合到林間而宴坐與釋種而同遊紫微虛宮  
黃屋曠位上靈聳動厚土怔惶弟子等身纏愛惑業構煩惱天生烝  
民樹以司牧僕僕黔首非后罔戴豈容至尊居萬乘而伸獨往之情  
應在帝王而爲布衣之事且蠻夷猾夏寇賊姦宄燧人警職日照甘  
泉之火四郊多壘未肆樓船之威若使七聖遂迷窅然汾水之上八  
駿沃若方在瑤池之濱則天下何依羣臣莫奉宗社廟堂有廢彝則  
弟子不勝狼狽之切謹捨如干錢如干物仰覲三寶大衆奉贖皇帝  
及諸王所捨悉還本位伏願十方三寶見前大德僧以慈悲力用無  
礙心坐道放光顯揚宣說歡喜和合超然降許當使皇帝望雲望日  
之姿與南山等固乃神乃聖之德與北極同尊中宮后妃之星金禎  
玉幹之戚窮積善之慶盡萬歲之歡玉鑾迴鑣金門洞啓百辟翹首

摺紳並列願塵勞與雲沴俱銷億兆與天地同泰慊慊丹愚敢以死  
請弟子某和南

摩訶般若懺文

梁武帝

菩薩戒弟子皇帝稽首和南十方諸佛及無量尊法一切賢聖觀夫  
常樂我淨蓋真常之妙本無常苦空乃世相之累法而苦樂殊見分  
別之路興真俗異名計著之情反顛倒我人之所彌見愚癡取捨有  
無之間轉成專附豈知妙道無相至理絕言實法唯一真如不二諸  
佛以慈悲之力開方便之門教之以遣蕩示之以冥滅百非俱棄四  
句皆亡然後無復塵勞解脫清淨但般若之說唯有五時而智慧之  
旨終歸一趣莫非第一義諦悉是無上法門弟子頗學空無深知虛  
假王領四海不以萬乘爲尊攝受兆民彌覺萬幾成累每時不顯嗟  
三有之洞然終日乾乾歎四生之俱溺常願以智慧燈照朗世間般  
若舟航濟渡凡識今謹於某處建如干僧如干日大品懺現前大衆

至心敬禮慧命須菩提願諸衆生離染著相迴向法喜安住禪悅同到香城共見寶臺般若識諸法之無相見自性之恆空無生法忍自然具足稽首敬禮常住三寶

金剛般若懺文

菩薩戒弟子皇帝稽首和南十方諸佛無量尊法一切賢聖如來以四十年中所說般若本末次第略有五時大品小品枝條分散仁王天王宗源派別金剛道行隨義制名須真法才以人標題雖復前說後說應現不同至理至言其歸一揆莫非無相妙法悉是智慧深經以有取之既爲殊失就無求也彌見深乖義異去來道非內外遣之又遣之不能得其真空之以空之未足明其妙真俗同棄本迹俱冥得之於心然後爲法是以無言童子妙得不言之妙不說菩薩深見無說之深弟子習學空無修行智慧早窮尊道克己行法方欲以家刑國自近及遠一念之善千里斯應一心之力萬國皆歡恆沙衆生

皆爲法侶微塵世界悉是道場今謹於某處建如干僧如干日金剛般若懺見前大衆至心敬禮釋迦牟尼佛金剛般若禮長老須菩提願諸佛菩薩以般若因緣同時集會哀憐萬品護念羣生引入慧流同歸佛海得金剛之妙寶見金牒之深經頂戴奉持終不捨離逮得己利盡諸有結心行自在無復塵勞稽首敬禮常住三寶

勝天王般若懺文

陳宣帝

菩薩戒弟子皇帝稽首十方諸佛無量尊法一切賢聖自鶴林滅迹鷲嶺凝神瓶寫總持遺文不墜傳燈流布法輪踰廣方軌弘宣旣昭著於西域分鑣顯說亦漸移於東土而周朝徵應止見夜明漢帝感通不過宵夢香象所載虎觀寂而未聞龍宮所藏麟閣闕其無取山海爲隔傳授蓋微華夷不同翻譯何幾天王所問止得經名金剛之經纔見一品歷魏晉而未備經宋齊而恆闕我皇帝承家建國光前絕後道格天地通被幽微大啓慈悲廣開智慧施造化以仁壽濟蒼

生於解脫異世界而承風殊刹土而響應真人間出法寶傳通粵以  
天嘉六年外國王子月婆首那來遊匡嶺慧解深妙靡測聖凡奉持  
勝天王般若經一部於彼翻譯表獻京師某校彼前名冥合符契總  
三乘之通教貫六度之淵海如開暗室以照優曇十方衆生若貧人  
之獲寶四部弟子等力士之得珠金牒寶印始茲辰而一啓智慧實  
法洎爾時而方具故知如來付囑必俟仁王般若興隆期於聖運弟  
子纂承洪緒思弘大業願此法門遍諸幽顯今謹於某處建如干僧  
如干日勝天王般若懺見前大衆至心敬禮本師釋迦如來禮般若  
波羅蜜禮勝天王願一切衆生勤求般若不避寒暑如薩陀波崙不  
愛身命如精進力菩薩得般若之性相與般若而相應攝諸萬有住  
安隱地含靈有識悉獲歸依稽首敬禮常住三寶

妙法蓮華經懺文

陳文帝

菩薩戒弟子皇帝稽首和南十方諸佛無量尊法一切賢聖竊以前

佛後佛種種因緣已說當說各各方便莫非真語悉爲妙法理無二極起必同歸但因業因心稟萬類之識隨見隨著異羣生之相品位分淺深覺悟有遲速法兩一味得之者參差法雷一音聞之者差別是以小乘頓教由此各名聲聞菩薩因斯分路至如鹿苑初說羊車小乘灰斷涅槃分段解脫以諸佛之善巧會衆庶之根機是曰半字未稱三點及夫會三歸一反本還源說大乘經名無量義滅化城於中路駕寶車於四衢衣裏明珠隱而還見髻中真寶於焉始得出寶塔於虛空踊菩薩於大地見希有事證微妙法最勝最尊難逢難值弟子以因地凡夫屬符負荷方欲憲章古昔用拯黎元竊以羲皇結網深失大慈成湯解羅猶非妙善揚旌丹水異道樹而降魔執玉塗山非寶坊之大集所以憑心七覺繫念四勤住菩薩乘顯無三之教學如來行開不二之門汲引羣迷導示衆惑今謹於某處建如干僧如干日法華懺見前大衆至心敬禮釋迦如來多寶世尊禮妙法華



大乘經典禮普賢菩薩妙光法師願多寶如來從地涌出普賢菩薩  
乘象空來並入道場證明功德擊大法鼓轉妙法輪震動世間覺悟  
凡品令使盡空法界無量聲聞無邊衆生皆爲菩薩總持性相同到  
無生稽首敬禮常住三寶

金光明懺文

菩薩戒弟子皇帝稽首和南十方諸佛無量尊法一切賢聖尋夫靈  
鷲山間自有常住之相白鶴林處本無變易之法故知真解脫者誰  
辨去來實智慧者非有生滅而顛倒迷愚不曉三點之理無明覆蔽  
空有八十之疑於是四佛世尊百千菩薩俱會信相之室顯說釋迦  
之壽明稱歎之妙偈出懺悔之法音是曰經王微妙第一以種智爲  
根本以功德爲莊嚴能照諸天宮殿能與衆生快樂能銷變異惡星  
能除穀貴饑饉能遣怖畏能滅憂惱能却怨敵能愈疾病如法修行  
功德已甚弟子以茲寡昧纂承洪業常恐王領之宜不符正論御世

之道有乖天律庶績未康黎民弗乂方願歸依三寶憑藉冥空護念  
衆生扶助國土今謹於某處建如干僧如干日金光明懺見前大衆  
至心敬禮釋迦如來四佛世尊金光明經信相菩薩願諸菩薩久住  
世間諸天善神不離土境方便利益增廣福田映慈悲雲開智慧日  
作眼目導爲依止所成就菩提之道場安住不動之境國稽首敬禮  
常住三寶

### 大通方廣懺文

菩薩戒弟子稽首和南十方三寶竊以諸佛刹土不可言說如來稱  
號無有限量或過去見在共取頗羅之姓或同時異世俱有釋迦之  
名或明王十億或燃燈三萬去來三界遍滿十方聞名者離塵受持  
者得道其爲功德難用思議釋迦如來以無礙力遊娑羅之淨道止  
吉祥之福地寶池化生金花自踊說大通方廣出三寶名號譬如六  
天總歸一乘弟子用慈悲之心修平等之業常以萬邦有罪責自一

人四生未安理爲重任所以薰修在己日夜忘勞精進爲心夜分未  
息菩薩行處皆願受持諸佛法門悉令如說欲使普天率土無復怖  
畏之塵蠕動蜻飛永得歸依之地今謹依經教於某處建如干僧如  
干日行方廣懺悔讀誦百遍右遶七匝塗香末香盡莊嚴之相正念  
正觀罄精懇之心見前大衆至心敬禮本師釋迦如來禮方廣經中  
所說三寶名字願諸佛菩薩尋聲赴響放淨光明照諸暗濁施清涼  
水滅茲渴愛登六度舟入三昧海總萬有而會真如齊三界而登實  
法稽首敬禮常住三寶

虛空藏菩薩懺文

竊以菩薩之於衆生是大依止觀察性相隨機濟拔一人未度不證  
道果往古今來行願如一而虛空藏菩薩最爲勝上爲衆中之幢王  
爲大明之尊主具諸佛之智慧得如來之祕密至因夢見形隨緣示  
相一聞稱號水火不能焚溺一心稱名刀杖不能傷害壽命財產之

願念而必諧色聲味觸之須求而皆遂身心疾惱憐愍療治牢獄怖  
畏方便解釋此蓋隨從世法安樂衆生及夫動神變相去香集之境  
放淨光明來閻浮之界入三昧定除煩惱熱說陀羅尼破惡業障五  
濁惡世一時清涼五根本罪並皆解脫此則開世間之眼示涅槃之  
路弟子承如來之教稟諸佛之慈國被菩薩之功家行大士之業方  
願十方刹土悉有一乘十方衆生皆修十地今謹於某處建如干僧  
如干日虛空藏菩薩懺見前大衆至心敬禮本師釋迦文佛禮勝花  
敷藏如來禮陀羅尼神呪禮虛空藏菩薩願虛空藏菩薩尋聲應赴  
現神通力開智慧光以種種身遊諸國土度脫衆生不乖誓願稽首  
敬禮常住三寶

方等陀羅尼齋懺文

竊以三世諸佛以誓願因緣十方如來以智慧方便縱無礙之辯開  
無盡之門法流派別宗源無限法本分散枝條不極非直摩訶般若

獨有八萬四千至於陀羅尼門亦有九十二億處處宣說種種名稱  
功德無量威神不測至如婆藪之拔地獄波旬之發菩提花聚之獲  
神通雷音之脫掩蔽莫不因斯章句承茲業力亦有四部弟子十方  
衆生聞一句而發心聽一說而悟道故知一切諸法無非真妙弟子  
側身修行所學者菩提旰食夙興所行者濟度一心之力攝取衆生  
一念之頃遍諸法相如來種智皆願總持諸佛功德悉欲流布今謹  
於法典本之經教見前大衆至心敬禮釋迦牟尼佛禮陀羅尼章句  
禮雷音比丘禮華聚菩薩願承此功德調伏衆生滅三毒心破十惡  
業四百之煩惱自然清淨八萬四千塵勞一時解脫得神呪之力具  
法印之善入陀羅尼門觀諸佛境界頓銷獄火永盡無餘稽首敬禮  
常住三寶

藥師齋懺文

竊以諸行無常悉爲累法萬有顛倒皆成苦本熱燄鏡像知變易之

不停漂草爨茅見生滅之奔迅隨業風而入苦海逐報障而趣幽途  
去來三界未見可安之所輪迴五道終無暫息之期藥師如來有大  
誓願接引萬物救護衆生導諸有之百川歸法海之一味亦能施與  
花林隨從世俗使得安樂令無怖畏至如八難九橫五濁三災水火  
盜賊疾疫飢饉怨家債主王法縣官憑陵之勢萬端虔劉之法千變  
悉能轉禍爲福改危成安復有求富貴須祿位延壽命多子息生民  
之大欲世間之切要莫不隨心應念自然滿足故知諸佛方便事絕  
思量弟子司牧寡方庶績未乂方憑藥師本願成就衆生今謹依經  
教於某處建如干僧如干日藥師齋懺現前大衆至心敬禮本師釋  
迦如來禮藥師如來慈悲廣覆不乖本願不棄世間興四等雲降六  
度雨滅生死火除煩惱箭十方世界若輪燈而明朗七百鬼神尋結  
縷而應赴障逐香燃災無復有命隨幡續漸登常住遊甚深之法性  
入無等之正覺行願圓滿如藥師如來

娑羅齋懺文

尋夫真解脫者本自不生實智慧者今亦無滅故知鶴林變色非變  
易之文鷲山常在實常住之法但世界不一應赴所以不窮衆生無  
邊方便所以無際隨念隨著種種法門因業因心各各示見或八十  
小劫端坐之相未移方八十年無餘之機已及熙連河側晨朝之色  
忽明娑羅樹間中夜之聲便寂最後功德是曰茲辰弟子有緣闍浮  
囑當重任愍羣生之顛倒嗟庶類之愚迷常願造六度之舟濟之於  
彼岸駕一乘之御驅之於中道今謹於太極殿設無礙大會首僧一  
夕娑羅大齋願法雨法雲清涼三界之火慧燈慧炬照朗百年之室  
常住二字人天共聞伊字三點凡聖並悟無勞迦葉之問不待須跋  
之疑一切種智而爲根本無量功德以自莊嚴意樹開解脫之花身  
田含定慧之水居處吉祥之地枕藉福德之場與二氣而俱貞隨四  
時而納祐日月天子照合璧於大千星辰宮殿散連珠於百億慈悲

輕雨與祥風而並飛菩提寶雲共飛煙而合彩六合四海無復塵勞  
六道四生俱蒙清淨

無礙會捨身懺文

竊觀雅誥奧義皇王興在予之言禮經令典聖人揚罪己之說故亡  
身濟物仁者之恆心克己利人君子之常德況復菩薩大士法本行  
處應赴三界攝受四生運無量之四心修平等之六度國城妻子僮  
俛哀荒承祖宗之大業扶曳喘息當天下之重任黎民弗乂庶績未  
熙御朽履冰無忘兢業又以世相泡影有爲露電愛河奔迅欲海飛  
騰稟識同焚含靈共溺垂瑱憑玉還覺萬乘非尊當宁負展翻以萬  
機成累夕惕若厲思弘汲引每日不顯奉爲七廟聖靈奉爲皇太后  
聖御奉爲天龍鬼神幽冥空有三界四生五道六趣若色若想若怨  
若親若非怨親遍虛空滿法界窮過去盡未來無量名識一切種類  
平等大捨弟子自身及乘輿法服五服鑾輅六冕龍章玉几玄裘金



輪紺馬珠交纓絡寶飾莊嚴給用之所資待生平之所玩好並而檀  
那咸施三寶今謹於前殿設無礙大會奉行所願并諸功德具列於  
前願諸菩薩冥空幽顯俱到證明開智慧日映慈悲雲樹寶幢於大  
千擊法鼓於百億震動世界覺悟羣生放三昧之淨光流一味之法  
雨引愚癡於火穿拔煩惱於棘林出輪轉河到無生岸

廣弘明集卷第三十六

音釋

警效

警棄挺切效口漑切逆

躡

所綺切曳

臞

黑各切

臍

於告切

胸吁句切氣

燻

弋約切

噤

苦葷切

躡

鳥胃也

以温之也

燻

弋約切

噤

苦葷切

躡

躡

切盡

怔懼也

慄

徒頰切

診

郎計切陰

慄

苦葷切

廣

弘明

集

卷三十六

十三中華書局聚

卷之十六

甲子年八月大興寺觀音殿神林出經圖阿尼無生草

...

...

...

...

廣弘明集統歸篇序

唐終南山釋道宣撰

廣弘明者言其弘護法網開明於有識也自上九篇隨時布現籌度  
理路其緣頗悉然於志之所之未備詳覩如不陳列頌聲何寄故次  
編之殷鑒遐邇且法王御寓歌頌厥初梵王天王聲聞菩薩咸資偈  
讚用暢幽誠無經不有彰於視聽東夏王臣斯途不惑擬倫帝德國  
美無不稱焉所以寫送性情統歸總亂在於斯矣然晉宋已來諸集  
數百餘家信重佛門俱陳聲略至於摭拾百無一存且列數條用塵  
博觀



廣弘明集卷第三十七

唐終南山釋道宣集

統歸篇第十之一

淨業賦

并序

梁武帝

少愛山水有懷丘壑身羈俗羅不獲遂志舛獨往之行乖任縱之心  
因爾登庸以從王事屬時多故世路屯蹇有事戎旅略無寧歲上政  
昏虐下豎姦亂君子道消小人道長御刀應勅梅蟲兒茹法珍俞靈  
韻豐勇之如是等多輩誌公所謂亂戴頭者也誌公者是沙門寶誌  
形服不定示見無方於時羣小疑其神異乃羈之華林外閣公亦怒  
而言曰亂戴頭亂戴頭各執權軸人出號令威福自由生殺在口忠  
良被屠馘之害功臣受無辜之誅服色齊同分頭各驅皆稱帝主人  
云尊極用其詭詐疑亂衆心出入盤遊無忘昏曉屏除京色不脫日  
夜屬續者絕氣道傍子不遑哭臨月者行產路側母不及抱百姓懷

懷如崩厥角長沙宣武王有大功於國禮報無報酷害奄及至於弟  
姪亦罹其禍遂復遣桓神與杜伯符等六七輕使以至雍州就諸軍  
帥欲見謀害衆心不與故事無成後遣劉山陽灼然見取壯士貔虎  
器甲精銳君親無校便欲束身待戮此之橫暴出自羣小畏壓溺三  
不弔況復姦豎乎若默然就死爲天下笑俄而山陽至荊州爲蕭穎  
胄所執卽遣馬驛傳道至雍州乃赫然大號建牙豎旗四方同心如  
響應聲以齊永元二年正月發自襄陽義勇如雲舳艫翳漢竟陵太  
守曹宗馬軍主殷昌等各領騎步夾岸迎候波浪逆流亦四十里至  
朕所乘舫乃止有雙白魚跳入榻前義等孟津事符冥應雲動天行  
雷震風馳郢城尅定江州降款姑熟甲冑望風退散新亭李居士稽  
首歸降獨夫旣除蒼生甦息便欲歸志園林任情草澤下逼民心上  
畏天命事不獲已遂膺大寶如臨深淵如履薄冰猶欲避位以俟能  
者若其遜讓必復魚潰非直身死名辱亦負累幽顯乃作賦曰日夜

常思惟循環亦已窮終之或得離離之必不終負展臨朝冕旒四海  
昧日乾乾夕惕若厲朽索御六馬方此非譬世論者以朕方之湯武  
然朕不得以比湯武湯武亦不得以比朕湯武是聖人朕是凡人此  
不得以比湯武但湯武君臣義未絕而有南巢白旗之事朕君臣義  
已絕然後掃定獨夫爲天下除患以是二途故不得相比朕布衣之  
時唯知禮義不知信向烹宰衆生以接賓客隨物肉食不識菜味及  
至南面富有天下遠方珍羞貢獻相繼海內異食莫不必至方丈滿  
前百味盈俎乃方食輟筯對案流泣恨不得以及溫清朝夕供養何  
心獨甘此膳因爾蔬食不噉魚肉雖自內行不使外知至於禮宴羣  
臣饋膳按常菜食味習體過黃羸朝中班班始有知者謝朓孔彥穎  
等屢勸解素乃是忠至未達朕心朕又自念有天下本非宿志杜恕  
有云剗心擲地數片肉耳所賴明達君子亮其本心誰知我不貪天  
下唯當行人所不能行者令天下有以知我心復斷房室不與嬪侍

同屋而處四十餘年矣於時四體小惡問上省師劉澄之姚菩提疾  
候所以劉澄之云澄之知是飲食過所致答劉澄之云我是布衣甘  
肥恣口劉澄之云官昔日食那得及今日食姚菩提含笑搖頭云唯  
菩提知官房室過多所以致爾於時久不食魚肉亦斷房室以其智  
非和緩術無扁華默然不言不復詰問猶令爲治劉澄之處酒姚菩  
提處丸服之病逾增甚以其無所知故不復服因爾有疾常自爲方  
不服醫藥亦四十餘年矣本非精進既不食衆生無復殺害障既不  
御內無復欲惡障除此二障意識稍明內外經書讀便解悟從是已  
來始知歸向禮云人生而靜天之性也感物而動性之欲也有動則  
心垢有靜則心淨外動既止內心亦明始自覺悟患累無所由生也  
乃作淨業賦云爾

觀人生之天性抱妙氣而清靜感外物以動欲心攀緣而成皆過恆  
發於外塵累必由於前境若空谷之應聲似遊形之有影懷貪心而



不厭縱內意而自騁目隨色而變易眼逐貌而轉移觀五色之玄黃  
翫七寶之陸離著華麗之窈窕耽冶容之逶迤在寢興而不捨亦日  
夜而忘疲如英煤之在摘若駿馬之帶羈類白日之麗天乃歷年之  
不虧觀耳識之愛聲亦如飛鳥之歸林既流連於絲竹亦繁會於五  
音經昏明而不絕歷四時而相尋或亂情而惑慮亦惱耳而堙心至  
如香氣醇起觸鼻發識婉婉追隨氤氳無極蘭麝夾飛如鳥二翼若  
渴飲毒如寒披棘舌之嗜味衆塵無有大苦鹹酸莫不甘口噉食衆  
生虐及飛走唯日不足長夜飲酒悖亂明行罔慮幽咎身之受觸以  
自安怡美目清揚巧笑蛾眉細腰纖手弱骨豐肌附身芳潔觸體如  
脂狂心迷惑倒想自欺至如意識攀緣亂念無邊靡懷善想皆起惡  
筌如是六塵同障善道方紫奪朱如風靡草抱惑而生與之偕老隨  
逐無明莫非煩惱輪迴火宅沈溺苦海長夜執固終不能改迤否相  
隨災異互起內懷邪信外縱淫祀排虛枉命蹠實橫死妄生神祐以

招福祉前輪折軸後車覆軌殃國禍家亡身絕祀初不內訟責躬反己皇天無親唯與善人外清眼境內淨心塵不與不取不愛不嗔如玉有潤如竹有筠如芙蓉之在池若芳蘭之生春淤泥不能汙其體重昏不能覆其真霧露集而珠流光風動而生芬爲善多而歲積明行動而日新常與德而相隨恆與道而爲鄰見淨業之愛果以不殺而爲因離欲惡而自修故無障於精神患累已除障礙亦淨如久澄水如新磨鏡外照多像內見衆病既除客塵反還自性三途長乖八難永滅止善旣修行善無缺清淨一道無有異轍唯有哲人乃能披襟如石投水莫逆於心心清冷其若冰志皎潔其如雪在欲結其旣除懷憂畏其亦滅與恩愛而長違顧生死而永別覽當今之逸少想後來之英童懷荆玉而未剖藏神器而存躬修聖行其不已信善積而無窮永劫揚其美名萬代流於清風豈伏強而稱勇乃道勝而爲

雄

孝思賦

并序○太常卿劉之遴注文多不載

想緣情生情緣想起物類相感故其然也每讀孝子傳未嘗不終軸  
輟書悲恨拊心嗚咽年未髻亂內失所恃餘喘玲塤嫻媪相長齒過  
弱冠外失所怙限職荆蠻致闕晨昏江途遼窶家無指信髣髴行路  
先君體有不安晝則輟食夜則廢寢方寸煩亂容身無所便投刺解  
職以遵歸路於時齊隋郡王子隆鎮撫陝西頻煩信命令停一夕明  
當早出江津送別心慮迫切不獲承命止得小船望星就路夜冒風  
浪不遑寧處途次定陵船又損壞於時門賓周仲連爲鵲頭戍主借  
得一舸奔波兼行屢經危險僅而獲濟及至戾止已無逮及五內屠  
裂肝心破碎便欲歸身山下畢志墳陵長兄哀愍未許獨行續有北  
問狡虜寇邊朝廷以先君遺愛結民咸思在昔故舊部曲猶有數千  
武慶宗將領留防彼鎮時便有旨使扞壽春王事靡監辭不獲免刺  
史崔慧景志懷翻覆遠招逋逃多聚姦俠大猾凶醜莫不雲集至如

彭益韓元孫等不可稱數倍道電邁奄至淮淝凶徒疑駭相引離散  
臺軍主徐玄慶房伯玉等欲襲取慧景乃固禁之方得止息是歲齊  
明作相疑論未決密馳表疏勸徵慧景折簡而召必不違拒卽重遣  
還以安其心姦渠旣出緣邊無虞旬朔之間慧景反鎮卽便解甲以  
歸京師因爾驅馳不獲停息數鍾百六時會雲雷撥亂反正遂膺四  
海念子路見於孔丘曰由事二親之時常食藜藿之食爲親負米百  
里之外親沒之後南遊於楚從車百乘積粟萬鍾累茵而坐列鼎而  
食願食藜藿之食爲親負米不可復得每感斯言雖存若亡父母之  
恩云何可報慈如河海孝若涓塵今日爲天下主而不及供養譬猶  
荒年而有七寶飢不有食寒不可衣永慕長號何解悲思乃於鍾山  
下建大愛敬寺於青溪側造大智度寺以表罔極之情達追遠之心  
不能遺蓼莪之哀復於宮內起至敬殿竭工匠之巧盡世俗之奇水  
石周流芳樹雜沓限以國事亦復不能得朝夕侍食唯有朔望親奉

饋奠雖復得薦珍羞而無所瞻仰內心崩潰如焚如灼情切於衷事形於言乃作孝思賦云爾

感四氣之變易見萬物之化成受天和而異命稟地德而齊榮察蟪蛄於蚊睫觀鯤鵬於北溟彼含識而異見同有色而殊形雖萬類之衆多獨在人而最靈禮義別於飛走言語異於鸚猩念過隙之倏忽悲逝川之不停踐霜露而悽愴懷燧穀而涕零掩此哀而不去亦靡日而弗思仲由念枯魚而永慕丘吾感風樹而長悲雖一至而捨生奉二親而何期思因情生情因思起導情源以流澍引思心而無已旣懷憂以終身亦銜恤而沒齒常閒居以永念獨拊膺而自傷徒升岵而靡瞻空陟屺其何望涕縱橫以交流血沸涌而沾裳覽地義以自咎懼滅性之乖方仰太極以長懷乃告哀於昊蒼冀皇天之有感何報施之茫茫曉百碎於魏闕夜萬斷於中腸心與心而相續思與思而未央晨孤立而縈結夕獨處而徊徨氣塞哀其似噎念積心其

若狂至如獻歲發暉春日載陽木散百華草列衆芳對樂時而無歡  
乃觸目而感傷朱明啓節白日朝臨木低甘果樹接清陰不娛悅於  
懷抱但罔極而纏心蒹葭蒼蒼白露爲霜涼氣入衣淒風動裳心無  
迫而自切情不觸而獨傷若乃寒冰已結寒條已折林飛黃落山積  
白雪旅鴈鳴而哀哀朔風鼓而颼颼目觸事而破碎心隨感而斷絕  
無一息而緩念與四時而長切年揮忽而莫反時瞬睽其如電想慈  
顏之在昔哀不可而重見痛生育之靡咎顧報復而無片悲與恨其  
俱興涕雜血其如霰鸛青春而差池鴻素秋而翱翔去來候於節物  
飛鳴應於陰陽何在我而不爾與二氣而乖張常茹酷而輪迴歷日  
夜而不忘旣視丹而成綠亦見白而爲黃擾性情以翻覆汨神慮而  
迷荒想鳴鶴而魂斷聽孤雛而心死慟終天而無怙號畢世而靡恃  
觀休屠之日碑豈教義之所及見甘泉之畫像每下拜而垂泣忽心  
動而不安遽入侍於帝室值何羅之作難乃捨之以投瑟超王臣之

稱首冠誠勇而無匹士行己之多方見石他之有權身雖死而名揚  
乃忠孝而兩全顧丁蘭其何人家河內之野王時舞象而方及始成  
童而親亡刻木母以供事常朝夕而在傍劉鎮就養而不暇常遠汲  
而力寡苦節感於幽靈醴泉生於竈下顧長沙之臨湘有古初之道  
始時父沒而未葬遇鄰火之卒起乃伏棺而長號雨暴至而火死又  
何琦其亦然獨柩屋而全止至如王祥黃雀入帳隗通橫石特起盛  
彥之開母目邢渠之生父齒覽斯事而衆多亦難得而具紀靈蛇銜  
珠以酬德慈烏反哺以報親在蟲鳥其尙爾況三才之令人治本歸  
於三大生民窮於五孝置天地而德盈橫四海而不撓履斯道而不  
行吁孔門其何教

遊七山寺賦

梁宣帝

此山川之寥廓時天高而氣靜路閑曠而清華地幽栖而特挺窮浙  
右之標絕極宇中之勝境承興序而陟陟聊盤桓而騰騁盡登臨之

雅致悅誼囂之暫屏因茲連鑣結駟並幔方舟萬騎齊列千楫爭浮  
皆東南之俊異並禹穴之琳球差池集侶容與儻儻巷無服馬路寡  
遺輶窮周章而歷覽盡娛翫而遨遊爾乃傍林橫出輕舠上泝歷秦  
王之舊陌緣越地之昔路望塗山而斜繞逕南湖而迴渡連天台之  
華嶺引若耶之長注乍汎瀆而瞻望或陵峯而一顧於是歷樂林而  
南上升法華而望西有磕磕之奔澗復疊疊之長溪既皎潔而如鏡  
且見底而無泥途嶮峭而巉絕路登陟而如梯既攀藤而挽葛亦資  
伴而相提窮羊腸之詰屈極馬嶺之高低霧昏昏而漫漫風颯颯而  
淒淒瞻洪川其如帶望巨海其如珪執玉帛於茲地會諸侯而赴稽  
想疏柯之茂葉憶大骨之昏迷傳盛美於斯岳播遺範於氓黎既迺  
瞰往賢之舊跡美高尚之餘風踐遶草之蕪汲撥蓁芴之彌蒙各岳  
峨而峙立峻谷杳而虛冲春林漂而皆碧秋沼淨其如空既連綿而  
相接兼隱軫而無窮信英奇之攸止實翔集之所崇傍高巒而建刹



亦帶壠而成宮神靈更其盼饗仙聖互其交通巖霧霏而起霧樹布  
漫而抽叢嘉卉生其前後善草植其西東瞻朱扉之赫奕望寶殿之  
玲瓏擬大林之精舍等重閣之講堂既爽塏之禪宇亦顯敞之華房  
跨曲澗而爲室繞紆吧而修牆夕雲生於牕牖朝日照於簷梁諒隙  
曲而成麗蓋照景而生光流清梵之宛轉響桴磬之鏘鏘構造精密  
華麗無方清流四繞吐溜悠長灑迤闐閣峻絕堦隍水碓侔於金谷  
飛樓似於建章其徒衆則乍遊乍處或賢或聖並有志於頭陀俱勤  
心於苦行競假寐而誦習咸夙興而虔敬識苦空之迅流惜朝陰之  
奔競潛深窟而學六通隱閑蕪而修八正或燒體而爲功或灰身而  
入定熏名香之氛氲或飛錫而相映或振塵而高談或閑居而坐聽  
禪衆疑於漆木智士同於懸鏡既釋教之興華乃法輪之宣盛寺既  
憑山而構造山亦因寺而有七蓋靈瑞之所臻亦奇士之所出產龍  
劍之遺溪遊鹿機之餘術謝鳳來而容與鄭風反而蕭颺既清澗之

漣漪亦飛流之涌溢奇樹蒼而成林珍果榮而非一植山海之雙榴  
種丹盧之兩橘梅花皎而似霜黃柑壯其如日或擘擘而夏開也離  
離而冬實山多寶玩地出瓊珍金玉生其陽琰石出其陰神簧崑崑  
而獨立仙的皎皎而孤臨孰知歲之豐儉覩玄白而皆謀刻石記於  
羸德披圖悟於禹心懸崖百仞擢榦千尋岩嶢兮闊達螺峴兮嶽崑  
樹修聳而巖峻衆流激而水深仰瞻增其隱隱側眺覩其沈沈眇然  
兮無際邈爾兮無邊遠山崔嵬而間出近樹龍嵒而相牽巖將頽而  
未墮峯入漢而猶懸望蟬聯而蔽日視慄恍而連天有石帆之異狀  
擬瀑布之飛泉實逢巖而聚霧乃觸石而成煙旣嵯峨而蔭映亦嶢  
峣而阡綿旣遠控於江海兼近接於村田反瞰城邑傍眺市鄽稱神  
州之鎮嶺實天下之名川至若蓬萊遊於聖迹巫岫表於神仙衡陽  
聞於夏貢嵩岳重於周篇曾何比麗詎此同妍復有標奇神井萬載  
澄渟汲之不竭添之不盈雖頻撓而不濁徒屢攪而終清涉隆冬而

温煥經敲暑而泠泠異成都之飛火寧疎勒之表誠匹醴泉之蠲疾  
同淄水之鑿形亦有孤潭道士焦里夫人獨居味道寂絕朋賓餐霞  
永日靜坐千春衢無行跡路產荆榛旣勤劬而向道亦蕭灑而忘塵  
或逍遙而諷詠或擁膝而長吟同董生之垂讖學梁子之明箴將松  
喬而共侶與嚴衛而相親其林藪彌密羽族爭歸援連臂而下飲鳥  
比翼而羣飛鴻鵠集而相映白鷗鷖而生輝拂霜毛之奕奕鼓素翮  
之霏霏兼有奇禽猛獸偃息溪圻虎懷仁而不害熊隱木而生肥巨  
象數仞雄虵十圍麀鹿易附狎兔俱依同彭鏗之仙室異海鳥之知  
機藥卉叢生消廡駐老地出長齡墟多壽考似南山之溪谷匹井中  
之埋寶送劉五耆何殊四皓復有牛膝雞腸雀頭燕草甘菊辛夷苦  
參酸棗紫苑赤箭黃菁白藁天門地骨肉芝石腦神農是嘗仙經是  
造白兔服而通靈鹿皮餌而得道其果則有木瓜木棗楊桃楊梅朱  
橘冬茂黃蘗秋開楂梨並牡柿奈爭瓌枳椇列植而爲數懸鉤觸草

而徘徊林檎侔於萍實甘棠擬於帝臺紅梅萼萸車李胡頹綠探冬  
獻紫芋秋來半夏成圃春就羣栽枇杷梨豆椎栗兼該或炫炫之丹  
實或靡靡之青茱禦疾風而彌豔中巖霜而不摧旣翦鬱之梧桐亦  
檀欒之倚竹篠箭亂其形類筋桂異其品族映檐牖而交加繞房廊  
而郁毓抽葉蔭於清泉結根攢於幽谷靈木之所自生瑞鳥之所栖  
宿實散賞之佳地信開心而醒目至如涼秋九月百卉飄零氣淒淒  
而恆勁風颯颯而常生秋蟬引於南壠塞鳥吟於北庭蟋蟀哀嘶而  
遠聞孤猿叫嘯以騰聲鴻雁噤噤而夜響鷓鷯啁哳而悲鳴增逸民  
之放曠動遊士之滯情咸有志於獨往俱栖心於濯纓信達人之良  
會蓋可伸其遊矚故孝先往而成真慶緒經而離俗憑怪石而爲枕  
因滄浪而洗足蓋往賢之所同亦先儒之高學余宿昔之心期常有  
懷於遐邈屢徘徊於閬圃頻留連於名嶽念家國之隆恩緩獨往之  
遺躅欲抽簪而未從聊寄美於斯曲

宿山寺賦

梁王錫

脂車秣駟薄暮來遊入界道而遼朗息祇樹而淹留惟基構之所處  
實顯敞而高居延層軒之迢遞屬廣廡之踟躕差繡栢而反宇列緹  
柱而承隅爾乃陟飛陛於峻峻登步櫺於絕頂既中天而升降亦攀  
雲而遊騁宇陰陰而怡曠階肅肅而虛靜朗華鍾之妙音曜光燈之  
清影其房則開牕木末浮柱山叢引含光之澄月納自遠之輕風因  
明兮目極憑迴兮望通平原兮無際連山兮不窮識生煙於岫裏眄  
列樹於巖中樹陵危而秀色煙出遠而浮空情迢遙於原野心放曠  
於簾櫳夜悠悠而何期露瀼瀼而漸落翫一葉之流螢聆九野之鳴  
鶴盪泉兮藉芳杜入谷兮佩茲蘭靜嘯兮疏煩想獨往兮恣遊盤信  
一致之易息豈萬物之能干就薄帷而安夜寢迺高枕而極星闌

鹿苑賦

魏高允

啓重基於朔土系軒轅之洪裔武承天以作主熙大明以御世灑靈

液以滂沱扇仁風以遐被踵姬文而築苑包山澤以開制植羣物以  
充霧蠲四民之常稅暨我皇之繼統誕天縱之明睿追鹿野之在昔  
興三轉之高義振幽宗於已永曠千載而可寄於是命匠選工刊茲  
西嶺注誠端思仰模神影庶真容之髣髴耀金暉之煥炳卽靈崖以  
構宇竦百尋而直正絙飛梁於浮柱列荷華於綺井圖之以萬行綴  
之以清永若祇洎之瞪對孰道場之塗迥嗟神功之所建超終古而  
秀出實靈祇之協贊故存貞而保吉鑿仙窟以居禪闢重階以通術  
澄清氣於高軒佇流芳於王室茂花樹以芬敷涌醴泉之洋溢祈龍  
宮以降雨侷膏液於星畢若乃研道之倫行業貞簡慕德懷風杖策  
來踐守應真之重禁味三藏之淵典或步林以經行或寂坐而端宴  
會衆善以並臻排五難而俱遣道欲隱而彌彰名欲毀而逾顯伊皇  
輿之所幸每垂心於華囿樂在茲之閑敞作離宮以營築固爽塏以  
崇居枕平原之高陸恬仁智之所懷眷山水以肆目玩藻林以遊思

絕鷹犬之馳逐眷耆年以廣德縱生生以延福慧愛內隆金聲外發  
功濟普天善不自伐尙諮賢以問道詢芻蕘以補闕盡敬恭於靈寺  
遵晦望而致謁奉請戒以畢日兼六時而宵月何精誠之至到良九  
劫之可越資聖王之遠圖豈循常以明教希縉雲之上升羨頂生之  
高蹈思離塵以邁俗涉玄門之幽奧禪儲宮以正位受太上之尊號  
旣存亡而御有亦執靜以鎮躁覩天規於今日尋先哲之遺誥悟二  
乾之重蔭審明离之並照下寧濟於兆民上尅光於七廟一萬國以  
從風總羣生而爲導正南面以無爲永措心於冲妙夫道化之難期  
幸微躬之遭遇逢扶桑之初開邁長夜之始曙顧衰年以懷傷惟負  
以危懼敢布心以陳誠効鄙言以自著

大乘賦

并序

魏李顥

夫乘者蓋如來之道場也故緣覺聲聞謂之小乘言法駕之通馳如  
舟車之致遠也夫合抱輿於毫末九層作於累土從淺以高大理妙

在於不有迹麤由乎不無舉有以希無則無無以暢忘無以統有則  
有有以通無無以暢則乘斯小矣有有以通則乘斯大矣夫總福祐  
之會者莫尚於法身宣一切之知者莫貴乎如來故神稟靈照以觀  
三達之權思周深妙以入四持之門知色之空任而不敗起滅無崖  
終始無際形寄於宇宙之中而心包乎二象之外目察於芥子之細  
而識鑒乎須彌之大美哉淵乎其源固不量也嗟歎不足遂作賦曰  
建大乘之靈駕兮震法鼓之雷音除行蓋之欲疑兮餐微妙以悅心  
滿覺意之如海兮演般若之淵深平八道之坦蕩兮遊總持之苑林  
定禪思於三昧兮滅色想於五陰執抵羅之引弓兮操如意之喻琴  
破衆網之將裂兮剗貪垢而絕淫危泡沫之暫結兮焉巧風之足欽  
或明行而善逝兮積功勳以迄今收薩云之空義兮運十萬而魔擒  
開止觀之光燄兮消邪見之沈吟閉必固之垣牆兮同影響之難尋

詳玄賦

梁仙城山釋慧命



惟一實之淵曠嗟萬相之繁雜真俗異而體同凡聖分而道合承師  
友之遺訓藉經論之垂芳罄塵庸之小識請興言於大方何羣類之  
蠢蠢處法界之茫茫性窮幽而彌曉理至寂而逾彰既非空而非有  
又若存而若亡談秘密於慈氏歎杳冥於伯陽湛一虛而致極總萬  
有以爲綱雖卽事而易迷亦至近而難識非名言之所顯豈情智而  
能測口欲辯而詞喪心將緣而慮息故雖一音隨類之能三轉任機  
之力莫不停八正於寂泊之門輟四辯於恬惓之域尋其體也豁乎  
無際眇乎無窮源乎無始極乎無終解惑以茲齊貫染淨於此俱融  
該空有而闕寂括宇宙以通同論其用也一而能多靜而能亂挺萬  
類之殊形吐羣情之別觀結五住之盤根起十纏之羈絆隨迷悟而  
通塞逐昏明而集散四流因之漂蕩六道以之悠漫三賢十聖曖以  
聯綿二智五眼擘而輝煥渾升沉而共壑派違順以分岐體無非而  
不是用無相而不爲若純金不隔於環玠等積水不憚於漣漪故令

名用誼雜集起紛馳事若萬軫殊轍理則千輪共規觀無礙於緣起  
信難思於物性猶寶殿之垂珠若瑤臺之懸鏡彼此異而相入紅紫  
分而交映法無定於心境人靡隔於凡聖物不滯於自他事莫擁於  
邪正何巨細之殊越遂參互而容持隣虛含大千之界刹那總三際  
之時懼斯言之少信借帝網以除疑盡普眼而能矚豈惑識以知之  
覲九會之玄文覽萬聖之遺則睠常啼於東市慕善財於南國歷多  
城而進解訪衆師而遣惑始承命於文殊終歸宗於妙德雖遊形於  
法界未動足於祇園歎一王之似虐嗟五熱之非喧握手入和修之  
舍彈指開阿逸之門聞一音之常韻覩極聖之恆存三九於茲絕聽  
二七自此亡魂斯甚深之境界亦何易而詳論悼稟識之多迷慨羣  
生之少慧保一異之四邪執斷常之雙計怖夢虎於常眠翫空花於  
久翳縈結纏而未解任漂流而莫濟背七覺而逾昏染六慾而方滯  
何理通而志隔旣法是而情非忽於瞬而獨往久逃逝而亡歸埋寶

藏於窮舍匿明珠於弊衣抱一真而不識縈萬惱以歔歔嗟余旣已  
傷於悟晚且又悲乎命局藉五部之流耀蒙四依之睠錄涉講肆以  
開愚託禪林而遣慾猴著鎖而停躁虵入筒而改曲涉曠海以戒舟  
曉重幽以慧燭絕諍論於封想息是非於妄情創斂緣於有覺終寂  
慮於無生顯真宗之實相達世用之虛名道莫遺於始行暗弗拒於  
初明擬六賊其方潰冀十軍之可平昏雲聚而還散心河濁而更清  
性海無增減行月有虧盈疑兔足之致淺懼鴻毛之見輕爲山託於  
始簣庶崑崙之可成

玄圃園講賦

梁蕭子雲

曰天監之十七屬儲德之方宣惟玉帛之光盛信昌符之在焉於是  
上照天下漏泉輪囷之氣吐烟日月之景揚員乃聖武之龍飛載爲  
家於天下思承規於景數遂長發而明社若重光於有周似二英於  
皇夏方前星而列曜播洪鍾於胤雅去茲永福來卽東朝文物是紀

聲明是昭發玄章於粉績靡青綾於翠翹鑾納那而垂藻笳和鳴以承簫載錫其光令聞令望察情幄帳護齒虞庠性與天道言爲珪璋詩史遙集禮易翱翔義華洛水文麗清漳昔七覺之吐華高人天而爲長道西被乎日用法東流而未朗故授神荊於文昌寄寶船於明兩異昔談而同世亦千年而影響聞填填之法雷見慧雲之初爽真如之軌旣接發揮之功已躡開金泥剖玉牒削蒸栗之簡採蘿樹之葉石室靈篇南宮神篋所以一音不已而待規重矩疊者矣惟至人之講道必山林之閑曠彼奈園與杏壇深淨名與素王模清游之浩瀼擬樂賢之隆壯睿情杳然是焉供帳乃高談玄圃之苑張樂宣猷之上觀夫靈圃要妙總禁林之叫窰稟輦道之三星躔离宮之六曜寫溟浚沼方華作峭其山則刻旒髀豸硯礪謳詭坂墀截薛夏含霜雪下則谿壑泓澄虹螭降升上則青霄丹氣雲霞鬱蒸金華琳碧燭銀硯石藻玉摛白丹瑕流赤周以玉樹灌叢紫桂香楓篔簹含人桃

枝育蟲妙草的爍靈果垂蔓長卿寒翠簡子秋紅崖戴雲而吐雨木  
鳴條而起風中有蘭渚華池淥流滌瀚激水推移彌望杳冥倒飛閣  
之嵯峨漾釣臺而浮迥張翠帷於鴻船泛羽旒於雀挺鳥則杉雞繡  
質木容錦章戴勝吐綬鸚鵡鷗香壁龜鷗紫驚鷗鷗鴛鴦風鳴日思高  
廣浮長內則錢苻菱華菡萏散葩碑砢巨石瀆漉碧砂離筵比日累  
綺紅蝦漂青綸之蕤折蕩碧組之鬋鬋銅龜受水而獨涌石鯨吐浪  
而戴華所以藉園籟之壯觀將髮像於毗耶於是清宮廣闢宿設宵  
張華燈熠燿火樹散芒斂閃六尺籠叢九光穎若流金之出沙嶼粲  
若列宿之動天潢朝曦朗而戒旦雲依霏而卷簇輕輦西園齊宮北  
園文衛濟濟僧徒肅肅法鼓朗而震音衆香馥而流馥亦有百獸收  
收矇矇雲車九層芝駕四鹿吳姬楚豔胡笳燕筑常從各倡戲馬蹋  
鞠巡少陽渡紫複繞崇賢瞰承祿揚散華之飄颻響清梵於林木燈  
王歸而贈筵香積來而獻熟似衆聖之乘空若能仁之在目旣而俄

軒有睟肆筵授几高殿肅而神嚴微言欣而奏理煥嘉語於丹青得親承於音旨智周物而爲心情研幾而盡諦言超超而出象理疊疊而踰繫類炙兩娛心之談未足云晉儲真假之理豈能逮史臣乃載筆撰功請事其職賦金相玉式世旣聞甘露之言民已登仁壽之域矣將奉瑤宮之軼陪雲樓之軼福穰穰委如山長莫長永無極

夢賦

釋真觀

昨夜眠中意識潛通類莊生之覩蝴蝶如孔氏之見周公雖夢想之虛僞亦心事而冥同爾乃見一奇賓傲岸驚人無名無姓如鬼如神姿容閑雅服翫光新入門高揖詣席誇陳余乃問曰夫邪不干正惡無亂善清濁異流升沉各踐吾身披法鎧心遊妙典六賊稍降四虵方遣大乘已駕小魔宜剪君是何人欲來何辯客乃對曰久承名行未遑修敬常深注仰每軫翹詠忽覩光儀良有嘉慶欲伸諮請願垂高命夫人生假借一期如擲倏虹電之驚天迅白駒之過隙豈不及

年時之壯美取生平之歡適或走名驥於長阡或駕飛輪於廣陌坐西園而召友敞南齋而對客出野外而操琴入閨中而撫石或復合罇促坐傳觴舉白重之以笑歌伸之以燔炙至如學富門昌德重名揚江東獨步日下無雙心爲義窟身是智囊貂金仕漢佩玉遊梁高車駟馬桂戶蘭房列燕姬而滿側湊秦女而盈堂聞弦管之寥亮聽絲竹之鏗鏘何則一生之快樂亦千載而流芳豈能栖栖獨處傍無笑語剃髮除鬚違親背主形容憔悴衣裳藍縷旣闕田蠶復無商估等碎繒之百結似破襖之千補至如玉露朝團金風夜寒老冉冉而行至歲忽忽而將闌牀空帳冷覆薄眠單絕子孫於後胤罷賓從之來歡欲以斯而爲道亦得道之量難余乃聽然含笑略陳心要徐而答曰省來說之矯張遂引誘於邪方欲以井蛙共海鯤而論大燭火與日月而爭光無異鷦鷯之比鵬翼培塿之匹崑崗爾旣昏懵於生死亦耽染於玄黃唯知酣酒嗜慾峻宇彫牆豈識多財之被害寧信

懷璧而爲殃佳味爽口美食爛腸貪淫致患渴愛成狂人生易盡物  
理無常朝歌暮哭向在今亡欣歡暫有憂畏延長且世閒紛攘竟無  
閑賞五苦競來百憂爭往妻子翻爲桎梏親愛更如羅網私里恆弊  
巘坳公事徒勞鞅掌榮華有同水沫富貴實如山響然自沈淪倒惑  
恆懷礲毒不孝不慈無道無德胸襟懽悞心腑讒賊自大憍奢志能  
苛尅詎識仁義誰論典則無趣損傷非理貪慝見利爭往臨財苟得  
失位失名亡家亡國命繩溘斷身城倒匱業繫其頭鬼穿其肋冰池  
向踐火山方冒忍痛自知銜悲誰告爾乃刀林擁聳劍樹嵯峨鱸飛  
猛燄鑊涌驚波稜層鐵網碌礫灰河頭逢鋸解骨被磨摩舉身星散  
合體滂沱凡諸苦難次第經過一朝鍾此萬恨如何若夫正法弘深  
妙理難尋非生非滅非色非心浩如滄海鬱似鄧林隨機卽赴逐感  
便臨內宣萬德外啓八音威降醉象影攝驚禽形如滿月色似融金  
遂令尼犍脫屣梵志抽簪然而出家之爲道也則蕭散優游無欲無



求不臣天子不事王侯似無瑕之璧如不繫之舟聲樂不能動軒冕  
不能留無爲無欲何懼何憂戒忍雙習禪慧兼修天人師範豪庶依  
投若夫爲學日益爲道日損損之則道業踰高益之則學功踰遠故  
形將俗人而永隔心與世情而懸反所服唯是三衣所餐未曾載飯  
從師則千里命駕慕法則六時精懇濯慮於八解之池怡神於七淨  
之苑至如道安道昱慧遠慧持赤鬚法主青眼律師弘經辯論講易  
談詩開神悅耳析滯祛疑並皆揚名後代擅步當時或與秦王而共  
輦乍將晉帝而同輿遂使桓玄再拜而弗暇郗超千斛而無辭爾乃  
行因已正方享餘慶四梵爭邀六天俱聘封畿顯敞國土華淨寶樹  
瓊枝金蓮玉柄風含梵響泉流雅詠池皎若銀地平如鏡妙香粉馥  
名花交映近感樂身遠招常命若夫六度修成十地圓明靈智旣湛  
種覺斯盈寂寥虛豁皎潔澄清非起非作無造無營法眼不闕其色  
天耳不聽其聲惡言不能加毀美譽無以爲榮質非質礙之質名非



欽崙 欽音欽崙音 欽崙峻也 龍崙 龍盧東切崙祖叢 崙胡了切 圻疑巾切 磨

於求切 蘊 孚陸切 菜 俱禹切 枳 藝 莫 藝於盈切 莫於 探 時占切 牝鹿也 蘊也 子可食 棋 俱木名 藝 莫 六切 藝 莫 草名 探 果名 似

奈而 柶 如支切 屋 綏 冠 追切 窾 他弔切 深遠也 剡 施 剡立紙切 巖 移 酸者 柶 柶上標也 綏 冠 追切 窾 他弔切 深遠也 剡 施 剡立紙切 巖 移

狎 蒲買切 牙宅買切 舊音 硎 礮 硎丘與切 礮助陵 夔 子公切 木細 獸名 今取山勢高低之貌 硎 礮 硎丘與切 礮助陵 夔 子公切 木細

滌 滌的領切 鸚 株玉切 鸚 鸚式容切 鸚 鸚步覓切 鸚 天兮 硎 滌 滌的領切 鸚 株玉切 鸚 鸚式容切 鸚 鸚步覓切 鸚 天兮 硎

硎 硎即兀切 兀五忽 瀆 瀆徒罪切 瀆徒可 筑 張六切 似 絙 居鄧 切 硎 硎危石也 瀆 瀆徒罪切 瀆徒可 筑 張六切 似 絙 居鄧

也 瞪 澄應切 嶺 嶺岨丸切 峴 吾 慵 候 慵力董切 候 郎計切 切 煩 愾 惕德切 溘 渴合切 也 愾 惕德切 溘 渴合切

也 愾 惕德切 溘 渴合切 也 愾 惕德切 溘 渴合切

此書... 卷之...

... 卷之...

... 卷之...

... 卷之...

... 卷之...

... 卷之...

... 卷之...

... 卷之...

... 卷之...

廣弘明集卷第三十八

唐終南山釋道宣集

統歸篇第十之二

傷愛子賦

并序

江淹

江芄字胤卿僕之第二子也生而神俊必爲美器惜哉邁閔涉歲而卒悲至躑躅乃爲此文

惟秋色之顛顛心結縉兮悲起曾憫憐之慘悽痛掌珠之愛子形惇惇而外施心切切而內圯日月可銷兮悼不滅金石可鑠兮念何已緬吾祖之赫羲帝高陽之玄冑惜衰宗之淪沒恐余人之弗構覲三靈之降福矧弱子之擢秀酷奈何兮胤卿那逢天兮不祐爾誕質於青春攝提貞乎孟陬謂比芳於右列望齊英於前修滯高行之美迹弘盛業之清猷白露奄被此百草爾同凋於梧楸憶朱明之在節顧岐嶷之可貴晚鑪帳而多招瞻戶牖而有慰奚在今之寂寞失音容

之髣髴姊目中而下泣兄嗟季而飲淚感木石而變哀激左右而隕  
歎奪懷袖之深愛爾母氏之麗人屑丹泣於下壤僚懸憂於上旻視  
往端而擗慄踐遺緒而苦辛就深悼而誰弭歸末命兮何陳我過幸  
於時私爰守官於江潯悲薄暮而增甚思纒黃而不禁月接日而爲  
光霞合雲而成陰霧籠籠而帶樹月蒼蒼而架林嗟奈何兮弱子我  
百艱兮是尋驗纖帶之夜緩察葆鬢之朝侵惟人生之在世恆歡寡  
而感饒雖十紀之空名豈百齡之能要迅朱光之映夜湛白露之凝  
朝指茲譬而取免排此理以自銷然則生之樂兮親與愛內與外兮  
長與稚傷弱子之冥冥獨幽泉兮而永闕余無愆於蒼祇亦何怨於  
厚地信釋氏之靈果歸三世之遠致願同升於淨刹與塵習兮永棄

無爲論

并序

吾曾迴向正覺歸依福田友人勸吾仕吾志不改故註無爲論焉  
有奕葉公子者聯蟬七代冠冕組望多素紉黼衣繡裳負長劍而耿

耿佩鳴玉而鏘鏘時遊稷下或客於梁間英雄而豹變聽利害以龍  
驤乃動朱履而馳寶馬振玉勒而曜金羈之無爲先生之門問曰先  
生智德光融嵩華無得以方其峻道義清遠溟海不足以喻其深無  
學不窺無事不達容儀閑靜言笑溫雅至如釋迦三藏之典李君道  
德之書宣尼六藝之文百氏兼該之術靡不詳其津要而採摭沖玄  
煥乎若覩於鏡中炳乎若明於掌內余聞天地之大德曰生何以聚  
人曰財是故老聃以爲柱史莊周以爲園吏東方持戟而不倦尼父  
執鞭而不恥實萬古之師範一時之高士先生嘉遁卷迹養德不仕  
乃列子之所待非通天下之至理雖江海以爲榮實縉紳之所鄙先  
生修爾笑而應之曰富之與貴誰不欲哉乃運而不通也夫忠孝者  
國家之急務也申生伍員不得志也懷道抱德玄風自翕尙楊雄東  
方其職未高也其大學者不過儒墨亦栖栖遑遑多有不遂也子所  
引之士者情雖欲之志不行也憂喜不移其情故可爲道者也過此

已往焉足言哉吾聞大人降迹廣樹慈悲破生死之樊籠登涅槃之彼岸闡三乘以誘物去一相以歸真有智者不見其去來有心者莫知其終始使得湛然常住永絕殊塗無變無遷長祛百慮恬然養神以安志爲業欲使自天祐之吉無不利舒卷隨取進退自然遁逸無悶幽居永貞亦何榮乎亦何鄙乎子其得之吾何失之塵內方外於是乎著公子恣然而有慚德逡巡而退

伐魔詔

并序

元魏釋懿

夫生在三界恆爲四魔所燒沈淪生死遍在六趣若一得人身及聞經法譬見優曇喻值浮孔尋惟聖教實開心目懿身處下流元希彼岸直因生有惡此漏身心去志恭徒然無補略因愚管除剿四魔昔在年幼嘗作破魔露布文雖鄙拙頗爲好事者所傳自遷都之後寓在洛陽忽於故塔之中得此本文時值今國都法師尙在金剛般若寺講勝鬘經輒以呈示法師學涉內外甚好文彩乃更披經卷賜示



魔事兼得擬符氏時釋道安檄魔文共尋翫之復竭愚淺修改舊文更作平魔赦重薦法師更無嫌也但安公檄文直推天魔凡爲世患經列有四且天魔權變非浮情所測煩惱陰死爲患實深輒更起伐魔詔慰勞文冠之於初是以前後不同文頗繁重冀信心君子兩得行之輒并編安法師檄文爲次合爲一卷

門下僞魔逋誅於茲曠劫鷹跄四山狼顧五道心頑縱毒常懷返噬固守一隅擁隔聲教自大通已降爰暨賢劫雖百王繼踵千聖相尋威懷百途獎導千計猶不能遏彼邪心息此異見得使貪競相緣瞋癡互舉常結四生終歸六趣眷言斯瘼實用傷懷今原燎方邇浸潤有漸無宜自寬以致顛覆可簡將練卒隨機殛撲勿使蒼生懷予復之歎主者告下時速施行

奉伐魔啓

臣信相等言奉被詔書如右臣聞見機者則承風以先附守迷者必

威加而後降是以舜舞干戚有苗自縛於王庭目連援弓則金地相  
園之日故能斬伏心王塞靜樓觀身被忍鎧手挈浮囊棄所保之貨  
賄設禪悅之名饋宴彼奇將集此雄勇志有所規則無往不摧心之  
所向則無思不服四魔區區焉足以規慮哉但今聚結未散事須平  
蕩輒依分處星言宿駕謹重申聞請可付外施行謹啓

慰勞魔書

告三界五道有識羣生等夫曦和迭駕盲者尙迷其光雷霆震響聾  
者猶惑其聽雖照屬理均而稟受道異致令法音擁於殊聞慈光蔽  
於異見昏痼相仍長迷永夜劫石有磷此緣無竭故我高祖愍此橫  
流心存拯溺體韞殊光口含異響開宏基於未前廓玄覺於有始故  
一闡洪猷則巨擘競馳再擇道教則羊鹿服御證無生於胸襟戢寂  
滅於懷抱但年德推移心存靜定爰命皇儲紹隆大業先帝藉此洪  
資纂我前緒積德三大累功塵劫心變冥機遊神赴會身固舟囊凌

波拯接出沒任情權旨自在故能超彼九劫降此四天跨據一方威  
攝萬國八十年中刑措不用但時不我與聖上遷化教迹道殊人懷  
異念卿等或是日種輪王世跨四域或是月性高良忠貞不貳享三  
界之名宦保一時之榮祿但爵命難恆時有瓦泰或因憍慢而喪家  
或由貪殘而失國故令後胤波流奄然忘返遵彼邪源汎此慾海而  
使天魔承釁作患於上方煩惱因茲侵淫於下國或縈中陰於未生  
或馳五衰以告老終疲升降長勤往沒幕府因機傑起英略超羣緯  
文經武體真練俗承百王之洪規稟萬代之遺則履道居彼龍象扣  
此津門方當馳光上下候騎八維總括羣邪羅絡萬有籠三界於一  
身抗百綱於無外摧拔須彌翻波巨海顛倒宇宙迴易日月使人天  
倒懸水陸燠沸然復塞其必我之心開其子來之路扇清風於塗炭  
布同愛於無間平蕩三途攝茲四有威以動之福以綏之叢爾小醜  
焉足以語哉卿等既爲所誤沈淪日久宜藉此時機早建良圖夫時

難得而易失機尚速而後悔若得時也則福祿競臻如失機也則敗捷爭及故寶融享爵事歸於先覺公孫嬰戮取敗於後機此皆往事之高鑒當今之軌轍且智者處危以謀安愚者臨成以致敗成敗安危在於時機非降自天抑亦人謀今三車竝駕寶藏初開懸重爵以俟功設天官以命哲正是大士縱橫之秋智勇獻功之日與卿等同發遐原枝流異土追惟在昔猶或依依言念四魔不覺撫劍故先遣白書略陳成敗曾改迷徒尋光赴命相與齊轡道場比肩輪下諮稟未聞受教君子友朋好合不亦善乎無宜大安斯趣盤桓遊逸恐此生滅相尋有無繼作若二毒一馳則義無怨親四凶互出則天壽俱翦雖欲保全其可得哉今善牙已建六軍啓途出彼火宅尋討未服梟斬之期非日即夕幸體往意時作出計勿懷猶豫濫嬰斯禍臨路遺書忽忽無盡

檄魔文

晉釋道安

彌天釋道安頓首魔將軍輪下相與雖復玄徒殊津人天一統宗師  
雖異三界大同每規良集伸其曩積然標榜未宣所以致隔今法王  
御世九服思順靈網方伸宏綱彌布大通有期高會在近不任翹想  
並伸預意釋道安頓首夫時有通塞禿終則泰千聖相尋萬師迭襲  
昔我高祖本元天王體化應符龍飛初域仗權刑以部萬邦奮慧柯  
以伏六合咸蕩四邪掃清三有方當抗宏綱於八區亘靈網於宇宙  
夷靜七荒寧一九土但冥宗不弔真容凝靜重明寢輝虛舟覆浪故  
令蛇蟻煩興梟獍競起翳染真徒塵惑清衆虐被蒼生毒流萬劫怪  
道有情異心同忿我法王體運應期理物上籍高貴下託羣心秉玄  
機以籠三千握聖徒而降大業雲起四宮鸞翔天竺降神迦夷爲法  
城壘撫育黎元善安卿士匠導羣賢慰喻有疾嚴慧柯於胸中被神  
鉞於身外愍十八之無辜哀三空之路絕志匡大業情必平難百域  
千邦高伏風化承君久抱惑心重迷自覆深執愚懷固守僞見狼據

欲天梟鳴神闕畔換疆場抗拒靈節謂天位可登洪規可改覽茲二  
三遠爲歎息何者大通統世則羣方影從而僞癡天魔不遵正節忤  
忤聖聽塵撓神心領卒塞虛奇形萬變精甲曜曦霜戈拂日靈鼓競  
鑿響衝方外高步陸亮自謂強威而王師一奮羣邪殄喪衆迷革心  
望風內附況君單將僥然一介土無方尋衆不成旅而欲背理違常  
陵墟華邑篡奪靈權勝常取信以僞忝真可不謬乎今釋迦統世道  
隆初劫妙化堂堂神羅遠御智士邕邕玄算蓋世武夫龍超捉韃千  
隊協略應真奇謀超拔故命使持節前鋒大將軍閻浮都督歸義侯  
薩陀波崙獨稟天姿義陳玄覺神高須彌猛志籠世善武經文忠著  
皇闕領衆四十萬億揚鑣路首故命使持節威遠大將軍四天都督  
忉利公導師曇無竭武勝羣標文超隨夏宏謀絕塵心栖夢表每憂  
時忘身志必匡世領衆百億虎眄須彌故命使持節征魔大將軍六  
天都督兜率王解脫月妙思虛玄高步塵表略並童真功侔九地悼

愍三塗忿君縱害援劍慷慨龍迴思奮領衆五百萬億鸞鳴天衢故  
命使持節通微將軍七天都督四禪王金剛藏朗志虛玄金顏遐矚  
恩殊九錫力傾山海左顧則濛汜飛波右眄乃扶桑落曜德無不施  
威無不伏領衆七百萬億雲迴天門故命使持節鎮城將軍九天都  
督十地大王維摩詰奇算不思法柯遠震體合神姿權像萬變呼吸  
則九服雲崩叱吒則十方風靡威被下愚愍辜酸楚領衆九百億飲  
馬靈津故命使持節鑒復大將軍十九天都督十住大士文殊師利  
承胄遐元形暉三耀身自金剛神高體大應適千途玄算萬計羣動  
感於一身衆慮靜於一念深抱慈悲情兼四攝領衆塵沙翱翔斯土  
故命使持節匡教大將軍十九天都督錄魔諸軍事羣邪校尉中千  
王觀世音智略淵深慧網遐網明達六通朗鑒三固或託跡羣邪耀  
奇鋒起或權形二九息彼塗炭揮手則鐵圍摧巖噓吸則浮雲頽嶮  
能爲十方作不請之益領衆不思風吟虎嘯故命使持節撫化大將

軍十方三界大都督補處王大慈氏妙質從容天姿標朗體踰金剛  
心籠塵表猛志衝天慧柯遠奮無生轉於胸中權智應於事外志有  
所規無往不就威恩雙行真俗並說領衆八百萬億嚴駕待命勇士  
之徒充盈大千金剛之士彌塞八極咸思助征席卷六合乘諸度之  
寶軒守八正之脩路跨六通之良馬捉虛宗之神轡彎四禪之良弓  
放權慧之利箭鳴驥浩浩輕步矯矯撫劍飛戈長吟命敵而將軍累  
世重光匡濟帝業歷奉聖庭曾無有闕貴卽導師身子五百幽鑿天  
命秉受王化聖上開襟皆授名爵封賞列土功侔舊臣聲蓋萬域而  
君何心橫生異見偃蹇邊荒頑顧帝位毒害勃於蒼生災禍流於永  
劫可不哀哉可不謬哉君昔因時荒爲物所惑狂迷君心投僞外竄  
百行一愆賢達尙失久謂君覽智返愚歸罪象魏束身抽簪同遊羣  
儁以道自娛榮名終始仍執愚守惑偷安邪位託癡山以自高恃見  
林以遊思耽六欲之穢塵翫邪迷以娛性建憍慢之高幢列無明之



凶陣闊步長塗輕弄神器盜篡天宮抗拒日月恐不異舉手欲障三  
光抱土而填四海打鼓與雷爭音把火共電競耀雖擬心虛標事難  
就矣然將軍植德玄津原承彌遠暉華炳然羣下矚目望貴之基易  
登由來之功可惜可改往修來翻然倏順誅過朱門與道齊好家國  
並存君臣俱顯取各獲安曉目達觀眷屬晏然可不美歟大師尅舉  
萬方矯轡手提法蠡齊撫慧劍道柯輝耀於前驅靈鼓震音於後隊  
神鐘一扣則十方遍覆海浪飛波則原陸湯沸當爾之時須彌籠爲  
微塵天地迴爲一粟無動安於左襟妙樂握於右掌神力若斯豈可  
當哉然我法王體大仁慈未欲便襲權停諸軍暫頓靈轡臨路遣書  
庶迴迷駕君可蚤定良圖面縛歸闕委命王庭逍遙閑境上方宰任  
非君而誰夫聖人上智識機明哲免禍窮而知返君子所美此乃轉  
福之高秋取功之良節昔夏桀無道殷王致伐商紂首亂周武建師  
此則古今之常軌將軍之明誠相與雖復形乖於當年風流於道味

人天崎嶇何足致隔想便霍然隨書投命所以切痛其辭委曲往久者不欲令芳蘭夏凋翠柯摧穎深思至言善從良計勿使君身傾匡三槩勿使六天深生禾莠迅目仰眺助情暢然臨紙多懷文不表意釋道安頓首頓首

魔主報檄

大夢國長夜郡未覺縣寢語里六自在主他化皇帝報檄於高座大將軍南閣浮提道綏撫大使佛尙書安法師節下音耗自遠喜同暫接尋覽句味良用欣然方見大國之臣禮義高矣承將軍虛心豁達密行淵玄襟帶山河牢籠宇宙慮深宗廟憂及生民秀氣千尋真心萬仞諒疾風之勁草也亂世之忠臣也冀道遇則隣彼我非隔俯從人事聊此報章昔周室既衰六國鼎沸漢朝運滅三分天下或外夷侵叛毒被中原或內禍潛作殃及良善應期鵠起達時豹變有之自古豈止今日惟蒼生覺積上天降禍釋迦皇帝奄然登遐哀纏臣妾

悲淚率土皇太子彌勒養德心宮滿月停山深叢隱藥數鍾百六之  
世將虧九五之君諸侯姦猾猜忌相處一十八部教軌參差九十六  
道罇俎迴互狼噬海濱梟鳴山曲左不記言右不記事國憲朝典與  
霜露而凋零天璽帝璧回冰銷而葉散臣怨民怒衆叛親離逃逝無  
歸玲嶠長往竊謂數屬太平沐浴朝化時逢亂世濟難干戈蓋乃通  
人之權變也謹率義兵發憤忘食並登山拉虎臨河斬龍緯武經文  
輕身重義社稷是所不圖也天位非所傾望也直以心城無主邪戲  
塵勞杳漉慾流將心源而共遠惚恍大夢與永夜而俱長還因假寐  
弔民伐罪先遣聚沫大將軍黃玄侯率空華之卒策陽炎之馬卽乾  
城之隅結浮雲之陣戈甲昱爍弓戟參差鋒刃未交服兵先敗次命  
接響大將軍絲竹公領宮商之衆據傳聲之谷隨聞隨翦次命百和  
大將軍蘭麝伯領馨香之旅乘風扞陣千里無雲次命六味大將軍  
領肥美之卒爲面門都督安滄溟之口吞噬無遺次命七觸大將軍

領細滑之衆戰鼓纔擊身城瓦解五軍前討百戰恆捷自天是祐罄  
無不宜朕慮未窮巢穴躬行問罪戎衣旣整出自空窟發淵泉之智  
動山嶽之威承妄想之兵數盈兆載並潛神識海隱影心山命將元  
帥案劍城旅徵兵士卒擊刀結陣排空塞迴煙飛霧集莫不雄氣衝  
天吐妄雲於真際高風駭地驚塵浪於性海擊道品官軍霜夜杼籜  
一心旣沒還源彌遠六愛已然宅火逾盛縱橫翦掠腹背羅討六奇  
三略先蘊胸襟百步千策本無橫陣遂雲消霧卷吾道興焉於是分  
官置職行我風化勅無廉驃騎虎踞貪山性澀將軍龍蟠慳海贍恤  
之士水陸無寄勅繫地郎將置陰陽之府情塵駙馬觀伉儷之兵愛  
水暫流身城被漬欲火纔發天廟遭燒繕性將軍已從焚溺勅咆嘯  
校尉弓劍隨身鳩毒鷹揚戈戟在手嚴毅士卒警固賄城使平忿將  
軍銷聲剗跡勅正勤御史且停監察隨眠武侯安撫朝猷放蕩無明  
縱恣有待使精進一馬罷行四勤之路迦留二箭不射三空之門勇

猛將軍風煙歟滅勅覺觀大司馬置府初禪邪思惟都尉列陣三有  
以心原未靜頻被風波禪枝欲茂再遭霜雪安靜將軍埋身亂境勅  
我見行高鎮陀那之嶺惑山萬仞疑戍百重討返還迷問津天路使  
觀身實相伸如羊角緣寂妄業密若魚鱗故毒動狂子酒醒醉客覆  
真金藏隱肥膩草博通將軍兀焉如醉斯則率土之賓皆吾民也今  
十軍意氣五將英雄乘機廢立成國宗廟朕俛仰卽位臨軒御字纂  
承王業握圖受命因弱之輪無際足擬金輪心與駿馱有餘聊充紺  
馬衣冠統二車書已一方扇長風於火宅奮高車於門外解釋甲冑  
與民更始將軍士卒並亡智力俱喪路窮箭盡棄馬焚舟螳蝦舉臂  
良可愍也良可恥也豈盜跖率卒侵暴諸侯孔丘冒陳流汗反府卽  
將軍之明誠也皇太子彌勒代邸龍飛朕汗馬歸朝銜罪庭闕將軍  
見徵未敢聞命也情深筆短不能多白冀歸高君子相期於言外焉  
波旬頓首死罪

破魔露布文

廣緣將軍流蕩校尉都督六根諸軍事新除惡建善王臣心賑惠將軍善散子都督廣濟諸軍事監軍臣施繕性將軍尅欲界都督攝志諸軍事司馬臣戒平忿將軍蕩恚侯都督洪裕諸軍事司空公臣忍勇猛將軍勤習伯都督六度諸軍事行臺臣進安靜將軍志念都尉都督觀累諸軍事攝散侯臣禪博通將軍周物大夫都督洞達諸軍事監照王臣智行宮謹案臣等聞治靜泰平兇徒有時以興化清去殺逆黨因之而作是以文命引狩於九圍遇死魔於塗山頂生騰輪於六合值貪賊於忉利故使身滅知威魂散聞越淪蕩他鄉退失尊位良由內挾姦邪外樹塵軌賞差信功罰乖臣惡故也自世宗釋迦文皇帝晏駕固林倏餘千載太子慈氏阿逸多有事兜率未遑紹襲法城暫空梵輪無主塵域外叛沙州弗貢遂使三界風驚六天烽起邪徒詭說翻成異俗僞自在天主賊王波旬稟質昏精體襲邪氣我

慢在心愛結盈慮矯奪慧命竊弄神器放縱欲界鬪鬪皇境且其正  
教陵替內外相違姊妹同姦千子貳志三女邪蕩邀我上宮姿態未  
施自貽伊辜又波旬既習小道頗有才辯復諫飾非好是異怒不用  
順子之言專從佞臣之計伺國間隙乘釁來侵僞結使大將諸煩惱  
等因聖道消運鍾八百光音無間十纏斯作遂陳欲兵於愛海策疑  
馬於高原控轡於二見之域馳騁於無明之境值聖則卷跡高栖遇  
惡則馳據中區負險重關觀時而設或志求榮利假寐權門或含忿  
威衆專行毒害意氣稜層固守方寸憍慢邊隅未識正朔方復假遣  
七使傳車三障詭宣六條以致殊俗愚者承教而濯纓智人棄之而  
澗飲畜卒俟前儲烽候進僞四天大都督五陰魔等置宅於無始之  
原卜居於有形之裏浮游於苦海之中放逸於火宅之畔竊號躬身  
假署六腑偷榮瞬息耽樂時顏元首未幾徒役無算飢兵始卒流川  
遍野怖士愁人亘山滿谷同惡相求輯結一方異類羣聚阻兵三界

僞署行臺有生賊王死觀兵五道置卒三途在生逆命處老作寇五  
衰告期四生應世壅塞泉源杜絕飄炎業力咆嘯丁危脆以先馳三  
毒趨趨策羣有而長逝安忍無親禍連九族威怒互行戮及忠孝方  
乃忽聖誣賢欺真枉正陷穽黎元羅絡凡庶妄計苦空以爲己有驟  
驚之勢謂固同金石者也以正月三十日黃昏時有一人姓善字知  
識從道場來告云賊去此不遠宜急翦撲不爾當爲大患臣聞此語  
未迷敬信單駕羊車轉軍化城深修壘柵自備而已賊方於後夜遣  
一使來多貢珍異求結和好臣知此賊勢若泡燄智計莫出意性狂  
勃難可親近弗與之言抱恨而去方多設詭計欲來侵逼卽以月七  
日向晨出方便門頓解脫處馳信郵以深入徵羣迷以出海纂集三  
昧以致一壘冀蕩除五陰戒清諸有賊方特固一川拒抗皇威其水  
彌漫廣深難際又值旋嵐傾勃雹霰瀉注擊浪揚波海神競涌七等  
雜類或飛或沈夜又守途羅刹決津汜瞽流龔覆沒善財其欲溯泳



鮮不沈溺又臨折阻涖大築城壘壁立隍峻險閣唯有一門四垂幽  
谷一人執戈萬夫懾思四果怯憚辟支戰慄遂集衆唱識規望進擊  
驟度能僉曰或可卽勒軍士爲渡水故備取諸草木編以爲棧附令  
抱踏橫波直進臣等手案浮囊泝流而往固護無非遂登彼岸部分  
將士修備兵車齊心戮力驅馳往撲卽遣安靖將軍領觀累之卒據  
散亂之原又使平忿將軍率洪裕之兵塞怒谷之口復令賑惠將軍  
引廣濟之衆截慳貪之路更勒博通將軍整洞達之士守狂癡之徑  
督師羅張四面交侵積戰告捷不月而三行臺恐衆懈怠不得競進  
乃催厲六軍置阿惟越地而餘燼遊魂偷安他化驅率犬羊欲來拒  
戰乃假虎兇以爲威招熊羆而自衛異首別面之徒吐風火而待發  
擔山戴樹之類方蟻聚以齊衡希進皇家膺符受命啓土塵劫疊聖  
重光享祚無窮先帝鼎湖之日顧命愍勲專令文德已來不許戰爭  
而致幕府受詔之初依勅而行略設六奇斷截而已但狂豎轉張散

亡逆節雖遺逸多曉喻都無悛心乃更命將大權徵兵十萬嘗未浹  
辰大淨邦土資無畏以嚴身兼衆好而獨拔龍蟠道樹虎視娑婆十  
號一宣則四八應期言教暫設則二九雲集遂擊法鼓而出三空建  
慈幢以臨八難講武大千曜威萬域神戈暫指則魔徒失膽慧劍一  
揮則羣邪俱斃現道身而斬死魔因般若以戮煩惱摧波旬於不動  
之林滅五陰於計性之境然後蹙巢守穴於不到處巡伏隱身者唯  
一人而已遠處膏盲非勇力攻及也遂乃竄生死於寂滅之原流老  
病於常樂之境排三障於六通之衢投十使於薩婆之域元兇旣梟  
首徒黨伏誅自餘從者並不追問諸有誠心先款者悉令解甲去鋒  
編戶民例授以遠號移之樂土爲拔五箭并以善醫療除垢病施慧  
湯藥於時業風息吹六塵弗起祥雲四舒靈禽翥翼引八部而自娛  
巖四七以守衛垂拱閑堂無爲而已大覺天王等好尙風軌志存拔  
擢援昔舊謨愨勲諫誥辭不獲免默許敷奏爾乃開甘露門出入正

道千輻雲迴來儀鹿苑四天獻器於高掌二商薦肴於兩謂故緣行  
錄勳則陳如先封真諦開賞則耶舍繼襲或朋類蒙榮或兄弟感澤  
揖不肖於初果表有德於十地依準古禮巡省方嶽振旅六城治兵  
八國理怨於三天之上問罪於九地之下徵英傑於十中會萬國於  
驚嶽華萇尅臻異士勇出於是啓寶藏以賑貧窮出三車以給諸子  
撫納黔黎寧堵復業乃身安一乘心固盤石據林眇水宣揚皇澤依  
恆說逸召集未賓仁風巾宇道光遐照四面交通化流無外聽訟於  
中路之域決判於寶山之所無量之威遠震成嶽無礙之智洞徹山  
河故土無二統車書一軌日月重光天地清朗六萬之衆解長圍以  
從正十仙之徒棄大河以就秩不動之賢不遠千里意樂之哲應感  
而至工人率簞食於尸城捷戰奉壺漿於長源內外尅清表裏咸泰  
實由道音四敷餘波東訓主上至心羣僚深敬稟承神規殄茲兇醜  
豈臣智力所能尅感也冀憑此一勳漸望更進方事前計凱旋未日

並露布以聞臣等死罪死罪

平魔赦文

門下首區同源因派異緒窪隆代興信背千途故智勝標宗歷塵劫而尙三燈明啓教經九中而未一況乃邪徒僞見駕刺犢於自然之原結賊妄根御形色於顛倒之境以茲偏師抗衡中道眷言二三良用憮然自先帝升遐寶曆無主淳風漸虧靈教異設僞魔乘間充斥神邑假變真容妄談空有驅役四生周還六趣畔渙欲天狼戾愛地毒被邊荒虐流華夏雖獫狁之侵宗周凶奴之陵炎漢未爲喻也朕以神昧主自塵劫幼齒參玄弱冠從政班名於大通之年驅驟於賢劫之下荷百億之重任忝三界之特尊人天樂推無所與讓遂陟靈壇受茲封禪顧唯多闕有慚庶政明發孜孜不遑啓處常恨邪境未清正教無一致使羣生沈淪魔境每一撫念用廢寢食遂命將徵兵以清時難上藉三昧之士下憑六度之師控清方夏大戡荒服故六

軍雷動則三有雲消慈施電馳則四凶面縛降附若塵生擒萬計唯  
波旬一人單馬奔迸百道截羅組繼不久且令五道告清宇外咸一  
思與天下同茲福慶可大赦天下與同更始改像教之號爲卽真之  
歲自二月八日昧爽已前繼組見徒悉皆原放若爲四魔所誤浮游  
三界犯十惡五逆毀經壞像三世所作一切衆罪能改過自新者不  
問往愆若亡命慾山挾藏姦器百劫不自首者伏罪如初其殺父害  
君傷兄烝母隨時投竄以息後犯其闡提一人不在赦書擯罪遙責  
神速可乘意驛遍告十方主者施行

奉平魔赦文啓

卽真元年二月八日中書令補處王臣逸多宣臣文殊等言奉被詔  
書如右臣聞毀忠謗善經千葉而不無邪臣逆子歷百代而常有是  
以三監流言伏罪於明時五世背道甘誅於聖世故王威必震慶當  
於周邦正教暫加福歸於露鼓伏惟陛下慈兼百王智齊千聖秉瑞

靈津握圖玄化出沒動於大千馳騁應於羣有服微形以引愚迷吼  
法音以警聾俗至乃刎身志道釘體求經析骸貿禽委命降獸捨塵  
劫之危體收一生之妙質龍潛四天利見闍浮輕彼七寶重此一乘  
撤翫深宮減膳河側去寶冠於苦林貿法衣於獵士故能駕御四禪  
時乘六度殄服羣邪易於返掌三界無熾然之警四生絕深溺之憂  
方復情存解網志尙宥愆十八來蘇萬國幸甚謹重申聞詣可付外  
施行謹啓

平心露布文

卽真元年二月八日侍中臣文殊師利侍中臣薩陀波崙黃門臣師  
子吼黃門臣舍利弗黃門臣須菩提擬唯識道行軍府謹奏平心露  
布事擬使持節儀同三司領十二住本將軍唯識道行軍元帥上柱  
國晉國公臣般若等言臣聞四魔放命歷代以之爲鯁五住遊魂含  
識因其致患是以三明聖智十力雄尊莫不屢動偏師頻行薄伐伏

惟陛下乘大慈而啓運應冥感而赴期奄宅神區光臨法海述前王之令典演衆妙於圓音考列聖之玄謀會羣生於淨國三千刹土共稟威靈百億類洲同遵聲教唯有僞心主阿黎耶識擅假名器叨竊生民跨有乾城綿歷年祀逐窮迷於夢境長夜不歸縱極亂於空花終年如醉權攀緣爲藩屏之任引戲論爲帷幄之臣陷溺黎元干擾鋒鏑陛下應真利物調俗御民念此鯨鯢斯塗炭遂詔臣揚旌色野問罪心庭臣敢効庸虛稟承奇略去四月十六日軍次心境卽以其夜初更與賊相見臣於是潛機密會玄契冥馳集戈船於六度之津命戎車於一乘之轍屯營三月揚淸梵以伸威列陣九旬擊鳴鐘而作氣阿黎耶識固重昏而莫曉執窮計而不移譬蟪蛄之拒輪等蜂蠆之含毒乃遣僞恆行大將軍阿陀那識率無明之子弟恃無賴之胸襟據守乾城與臣抗敵又遣僞自性大都督迦毗羅仙僞執此大將軍迦旃延子招引烏合聚結蟻徒搖蕩邊陲激揚聲勢臣遂分

布諸將指麾籌策遣擬使持節拔塵大將軍領四念處諸軍事率道  
品縣開國公臣求知擬使持節寧境大將軍領八正道諸軍事通真  
縣開國公臣如實知部勒驍雄星流電轉從方便諸道靜緣邊之界  
臣求知等尋名討義躡影追蹤乍橫行於密室之間或轉戰於隣虛  
之隙事窮理絕域盡途殫冥宗所以冰消數論於斯瓦解迦毗羅等  
知大乘之有在識玄統之所歸各將羸卒數千咸來請命臣哀其晚  
悟許以自新卽令慈悲觀道士畢無緣隨便安養僞諫議大夫郅諦  
懷逸羣之思負出世之奇將全國以効忠反危身而被繫臣以此月  
十五日夜挾中軍之勇氣乘外敵之離心手抗干戈躬先士卒爰命  
擬使持節兜率大將軍娑婆道招慰大使上柱國翹頭末開國公臣  
阿逸多擬使持節閻浮大將軍天竺大都督天竺諸軍事上柱國富  
婁沙開國公臣婆藪槃豆並以道邁三空神遊四辯使其招揚勝負  
曉喻是非又遣擬使持節平等大將軍兼行軍長史上柱國清涼縣



開國公臣正念擬使持節遍滿大將軍兼行軍司馬上柱國常樂縣  
開國公真如與臣表裏玄同更相應接於斯時也邊秋氣爽塞月光  
寒旌旗共雲漢齊高鋒鏑與霜天比淨披弘誓駕圓通超兩觀而爭  
前排千門而並入雖生死無際一念覩其濱涯塵勞有儻須臾見其  
崩潰僞丞相陳顯爲僕射慮思無計求生闔門自縊僞司空師子鎧  
僞司隸達磨多羅各擁餘師自嬰深壘狐疑競起猜詐萌生忍顛危  
而不見扶遂淪亡而莫能濟阿陀那與其僞主外無強援內寡深謀  
師旅困窮城池陷露君臣失色進退無依銜璧叩頭輿襯待罪臣卽  
梟陀那之首釋郅諦之囚廢彼昏王立其賢嗣方使宗禋不絕永爲  
茅土之君世德相承恆修職貢之禮於世氛禳開蕩若和氣之泮春  
冰醜穢殲夷似涼風之卷秋籜六根超絕不開亭障之虞三界寂寥  
無復風塵之警斯乃威光遠被士衆齊心豈臣微劣所能致此不勝  
慶快之至謹遣厚德府別將臣隰重知奉露布馳驛以聞



廣弘明集卷第三十九

唐終南山釋道宣集

統歸篇第十之三

四月八日讚佛詩四首

釋支遁

三春迭云謝首夏含朱明祥祥令一作日泰朗朗玄夕清菩薩彩靈

和眇然因化生四王應期來矯掌承玉形飛天鼓弱羅騰擢散芝英

綠瀾頽龍首縹藥翳流冷芙蕖育神葩傾柯獻朝榮芳一作津霧四

境甘露凝玉瓶珍祥盈四八玄黃曜紫庭感降非情想恬怕無所營

玄根泯靈府神條秀形名圓光朗東旦金姿豔春精含和總八音吐

納流芬馨跡隨因溜浪心與太虛冥六度啓窮俗八解濯世纓慧澤

融無外空同志化情

詠八日詩三首

大塊揮冥樞昭昭兩儀映萬品誕遊華澄清疑玄聖釋迦乘虛會圓

神秀機正交養衛恬和靈知溜性命動爲務下口寂爲無中鏡

真人播神化流渟良有因龍潛兜術邑漂景閣浮濱佇駕三春謝飛  
轡朱明旬八維披重藹九霄落芳津玄祇獻萬舞般遮奏伶倫淳白  
凝神宇蘭泉渙色身投步三才泰揚聲五道泯不爲故爲貴忘奇故  
奇神

緬哉玄古思想託因事生相與圖靈器像也像彼形黃裳羅帕質玄  
服拖緋青神爲恭者惠跡爲動者行虛堂陳樂餌蔚然起奇榮疑似  
垂曦微我諒作者情於焉遺所尙肅心擬太清

五月長齋詩

炎精育仲氣朱離吐凝陽廣漢潛涼變凱風乘和翔令月肇清齋德  
澤潤無疆四部欽嘉期辰己升雲堂靜晏和春暉夕惕厲秋霜蕭條  
詠林澤恬愉味城傍逸容研冲蹟綵綵運宮商匠者握神標乘風吹  
玄芳淵汪道行深婉婉化理長臺臺維摩虛德音暢遊方罩牢妙傾

玄絕致由近臧略略微容簡八言振道綱掇煩練陳句臨危折婉章  
浩若驚飈散罔若揮夜光寓言豈所託意得筌自喪霑濡妙習融靡  
靡輕塵亡蕭索情牖頽寥朗神軒張誰謂冥津遐一悟可以航願爲  
海遊師櫂施入滄浪騰波濟漂客玄歸會道場

八關齋詩三首

并序

間與何驃騎期當爲合八關齋以十月二十二日集同意者在吳縣  
土山墓下三日清晨爲齋始道士白衣凡二十四人清和肅穆莫不  
靜暢至四月朝衆賢各去余旣樂野室之寂又有掘藥之懷遂便獨  
住於是乃揮手送歸有望路之想靜拱虛房悟外身之真登山採藥  
集巖水之娛遂援筆染翰以慰二三之情

建意營法齋里仁契朋儔相與期良晨沐浴造閒丘穆穆升堂賢皎  
皎清心修窈窕八關客無捷自綢繆寂默五習真齋勵心柔法鼓  
進三勸激切清訓流悽愴願弘濟闔堂皆同舟明明玄表聖應此童

珍傲宋版印  
蒙求存誠夾室裏二界讚清休嘉祥歸宰相藹若慶雲浮

三悔啓前朝雙讖暨中夕鳴禽戒朗旦備禮寢玄役蕭索庭賓離飄  
颯隨風適踟躕岐路竭揮手謝內析輕軒馳中田習習陵電擊息心  
投佯步零零振金策引領望征人悵恨孤思積咄矣形非我外物固  
已寂吟詠歸虛房守真玩幽蹟雖非一往遊且以閑自釋

靖一潛蓬廬惜惜詠初九廣漠排林篠流飈灑隙牖從容遐想逸採  
藥登崇阜崎嶇升千尋蕭條臨萬畝望山樂榮松瞻澤哀素柳解帶  
長陵岐婆娑清川右冷風解煩懷寒泉濯溫手寥寥神氣暢欽若盤  
春藪達度冥三才恍惚喪神偶遊觀同隱丘愧無連化肘

詠懷詩五首

傲兀乘尸素日往復月旋弱喪困風波流浪逐物遷中路高韻溢窈  
窕欽重玄重玄在何許採真遊理間荀簡爲我養逍遙使我閑寥亮  
心神瑩含虛映自然疊疊沈情去彩彩沖懷鮮踟躕觀象物未始見

牛全毛鱗有所貴所貴在忘筌

端坐鄰孤影眇罔玄思劬偃蹇收神轡領略綜名書涉老哈怡一作雙

玄披莊玩太初詠發清風集觸思皆恬愉俯欣質文蔚仰悲二匠徂  
蕭蕭柱下迴寂寂蒙邑虛廓矣千載事消液歸空無無矣復何傷萬  
殊歸一塗道會貴冥想罔象掇玄珠悵快濁水際幾忘映清渠反鑒  
歸澄漠容與含道符心與理理密形與物物踈蕭索人事去獨與神  
明居

晞陽熙春圃悠緬歎時往感物思所託蕭條逸韻上尙想天台峻髣  
髴巖堦仰冷風灑蘭林管瀨奏清響霄崖育靈藹神踈含潤長丹沙  
映翠瀨芳芝曜五爽茗茗重岫深寥寥石室朗中有尋化士外身解  
世網抱朴鎮有心揮玄拂無想隗隗形崖頽罔罔神宇敞宛轉元造  
化縹瞥隣大象願投若人蹤高步振策杖

閑邪託靜室寂寥虛且真逸想流巖阿朦朧望幽人慨矣玄風濟一作

滋皎皎離染純時無問道睡行歌將何因靈溪無驚浪四嶽無埃塵  
余將遊其岵解駕輟飛輪芳泉代甘醴山果兼時珍修林暢輕跡石  
宇庇微身崇虛習本照損無歸昔神曖曖煩情故零零冲氣新近非  
域中客遠非世外臣憐怕一作澹泊為無德孤哉自有鄰

坤基葩簡秀乾光流易穎神理速不疾道會無陵騁超超分一作介石

人握玄攬機領余生一何散分不諮天挺沈無冥到韻變不揚蔚炳

冉冉年往逡悠悠化期永翹首希玄津想登故未正生途雖十三日

已造死境願得無身道一作理高栖冲默靖

迷懷詩二首

翔鸞鳴崑嶠逸志騰冥虛惚恍迴靈翰息肩棲南岵濯足戲流瀾採

練銜神蔬高吟漱芳醴頡頏登神梧蕭蕭倚一作椅明翮眇眇育清軀

長想玄運夷傾首俟靈符河清誠可期戢翼令人劬

鬚角敦大道弱冠弄雙玄逡巡釋長羅高步尋帝先妙損階玄老忘



懷浪濠川達觀無不可吹累皆自然窮理增靈薪昭昭神火傳熙怡  
安冲漠優游樂靜閑膏腴無爽味婉孌非雅絃恢心委形度疊疊隨  
化遷

詠大德詩

遐想存玄哉冲風一何敞品物緝榮熙生塗連惚恍既喪大澄真物  
誘則智蕩昔聞庖丁子揮戈在一作任神往苟能嗣冲音攝生猶指掌  
乘彼來物間投此默照朗邁度推卷舒忘懷附罔象交一作大樂盈胸  
襟神會流俯仰大同羅萬殊蔚若充甸網寄旅海漚鄉委化同天壤

詠禪思道人并序

孫長樂作道士坐禪之像并而讚之可謂因俯對以寄誠心求參焉  
於衡軛圖巖林之絕勢想伊人之在茲余精其制作美其嘉文不能  
默已聊著詩一首以繼於左其辭曰

雲岑竦太荒落落英岳布迴壑佇蘭泉秀嶺攢嘉樹蔚蒼微遊禽崢

嶮絕蹊路中有冲希子端坐摹

一作摩

太素自強敏天行弱志慾無欲

音喻玉質陵風霜淒淒厲清趣指心契寒松綢繆諒歲暮會衷兩息間  
綿綿進禪務投一滅官知攝二由神遇承蝸纒危丸纒十亦凝注懸  
想元氣地研幾革羸慮冥懷夷震驚怕然肆幽度曾筌攀六淨空同  
浪七住逝虛乘有來永爲有待馭

### 詠利城山居

五嶽盤神基四瀆涌蕩津動求自方智默守標靜仁苟不宴出處託  
好有常因尋元存終古洞往想逸民玉潔其巖下金聲瀨沂濱捲華  
藏紛霧振褐拂埃塵跡從尺蠖屈道與騰龍伸峻無單豹伐分非首  
陽真長嘯歸林嶺蕭灑任陶鈞

### 念佛三昧詩集序

釋慧遠

序曰夫稱三昧者何專思寂想之謂也思專則志一不分想寂則氣  
虛神朗氣虛則智恬其照神朗則無幽不徹斯二者是自然之玄符

會一而致用也是故靖恭閑宇而感物通靈御心惟正動必入微此假修以凝神積習以移性猶或若茲況夫尸居坐忘冥懷至極智落宇宙而闔蹈大方者哉請言其始菩薩初登道位甫闚玄門體寂無爲而無弗爲及其神變也則令修短革常度巨細互相違三光迴景以移照天地卷而入懷矣又諸三昧其名甚衆功高易進念佛爲先何者窮玄極寂尊號如來體神合變應不以方故令入斯定者昧然忘知卽所緣以成鑒鑒明則內照交映而萬像生焉非耳目之所暨而聞見行焉於是覩夫淵凝虛鏡之體則悟靈相湛一清明自然察夫玄音之叩心聽則塵累每消滯情融朗非天下之至妙孰能與於此哉以茲而觀一覲之感乃發久習之流覆豁昏俗之重迷若以疋夫衆定之所緣固不得語其優劣居可知也是以奉法諸賢咸思一揆之契感寸陰之頽影懼來儲之未積於是洗心法堂整襟清向夜分忘寢夙宵惟勤庶夫貞詣之功以通三乘之志臨津濟物與九流

而同往仰援超步拔茅之興俯引弱進垂策其後以此覽衆篇之揮翰豈徒文詠而已哉

念佛三昧詩四首

晉王齊之

妙用在茲一作幽涉有覽無神由昧徹識以照麤積微自引因功本虛

泯彼三觀忘此毫餘

寂漠何始理玄通微融然忘適乃廓靈暉心悠一作游緬域得不踐機

用之以冲會之以希

神姿天凝圓映朝雲與化而感與物斯羣應不以方受者自分寂爾

淵鏡金水塵紛

慨自一生夙乏惠識託崇淵人庶藉冥力思轉毫功在深不測至哉

之念注心西極

薩陀波崙讚

因畫般若若臺隨變立讚等

密哉達人功玄曩葉龍潛九澤文明未接運通其會神疎其轍感夢

魂交啓茲聖哲

薩陀波崙入山求法讚

激響窮山憤發幽誠流音在耳欣躍晨征奉命宵遊百慮同冥叩心  
在誓化乃降靈

薩陀波崙始悟欲供養大師讚

歸塗將啓靈關再闢神功難圖待損而益信道忘形歡不期適非伊  
哲人孰採玄策

曇無竭菩薩讚

疊疊淵匠道玄數盡譬彼大壑百川俱引涯不俟津塗無旋軫三流  
開源於焉同泯

諸佛讚 因常啼念佛  
爲現像靈

妙哉正覺體神以無動不際有靜不隣虛化而非變象而非摹映彼  
真性鏡此羣麤

法樂辭十二章

齊王融

天長命自短世促道悠悠禪衢闊遠駕愛海亂輕舟累塵曾未極心  
樹豈能籌情埃何用洗正水有清流

右歌本起

百神肅以虔三靈震且越恆一作常曜揜芳宵薰風動蘭月丹榮藻玉

墀翠羽文珠闕皓毳非虛來交輪豈徒發

右歌靈瑞

韶年春已仲明星夜未央千祀鍾休曆萬國會嘉祥金容涵夕景翠  
鬢佩晨光表塵維淨覺汎俗乃輪皇

右歌下生

襲氣變離宮重柝警層殿曼響感心神脩容展驩宴生老終以縈病  
死行當薦方爲淨國遊豈結危城戀

右歌在宮

春枝多病天秋葉少欣榮心骸終委滅親愛暫時生長風吹北隴迅  
瀑急東瀛知三旣情暢得一乃身貞

右歌四遊

飛策辭國門端儀偃郊樹慈愛徒相思閨中空戀慕夙隸乖往塗駿  
足獨歸路舉袂謝時人得道且還去一作顛

右歌出國

明心弘十力寂慮通四禪青禽承逸軌文驪一作鑣鏡重川鷺巖標遠  
勝鹿野究清玄不有希世寶何以導濛泉

右歌得道

亭亭宵月流朏朏晨霜結川上不徘徊條間函渝滅靈智湛常然符  
一作俯應有盈缺感運復來儀且厭人間世音泄

右歌雙樹一作寶樹

春山玉所府檀林芳一作鸞所棲引火歸炎燧挹水自清隄菴園無異

轍祇管有同躋比肩非今古接武豈燕齊

右歌賢衆

昔余輕歲月茲也重光陰閨中屏鉛黛闕下挂纓簪禪悅兼芳旨法  
言一作喜忘一作戀清琴一異非能辨寵辱誰爲心

右歌學徒

峻宇臨層穹迢迢疎遠風騰芳清漢裏響梵高雲中金華紛苒蓀瓊  
樹鬱青蔥貞心延淨境邃業嗣天宮

右歌供具

影響未嘗隔晦明殊復親弘慈迫已遠睿后扇高塵區中禋景福宇  
寓一作外沐深仁萬祀留一作流國祚億兆慶唐民

右歌福應

栖玄寺聽講畢遊邱國應司徒教

道勝業茲遠心閑地能隙桂棹鬱初栽蘭墀坦將闢虛檐對長嶼高



軒臨廣液芳草列成行嘉樹紛如積流風轉還旋一作逕清煙汎喬石  
日汨山照紅松映水華碧暢哉人外賞遲遲春將夕

述一作會三教詩

梁武帝

少時學周孔弱冠窮六經孝義連方冊仁恕滿丹青踐言貴去伐爲  
善在好生中復觀道書有名與無名妙術鏤金版真言隱上清密行  
遺陰德顯證在長齡晚年開釋卷猶月映衆星苦集始覺知因果方  
昭明示教唯平等至理歸無生分別根難一執著性易驚窮源無二  
聖測善非三英大椿徑億尺小草裁云萌大雲降大雨隨分各受榮  
心想起異解報應有殊形差別豈作意深淺固物情

開善寺法會詩

梁昭明太子

栖鳥猶未翔命駕出山莊詰屈登馬嶺迴互入羊腸稍看原藹藹漸  
見岫蒼蒼落星埋遠樹新霧起朝陽陰池宿早鴈寒風催夜霜茲地  
信閑寂清曠唯道場玉樹瑠璃水羽帳鬱金牀紫柱珊瑚地神幢明

月璫牽蘿下石墜攀桂陟松梁澗斜日欲隱煙生樓半藏千祀終何  
邁百代歸我皇神功照不極睿鏡湛無方法輪明暗室藝文作  
智日慧海  
渡慈航塵根久未洗希霑垂露光

望同泰寺浮圖詩并和  
三首

梁簡文帝

遙看官佛圖帶壁復垂珠燭銀踰漢女寶鐸邁昆吾日起光芒散風  
吟宮徵殊露落盤恆滿桐生鳳不雛飛幡雜晚虹音晝烏狎晨鳧梵  
世陵空下應真蔽景趨帝馬咸千轡天衣盡六銖意樂開長表多寶  
現金軀能令苦海渡復使慢山踰願能同四忍長當出九居穆天子  
傳天子  
之寶璿珠燭銀郭璞  
曰銀有精光如燭也

奉和

王訓

副君坐飛觀城傍屬大林王門雖八達露塔復千尋重櫺出漢表層  
拱冒雲心崑山雕潤玉麗水瑩明金懸盤同露掌垂鳳似飛禽月落  
簷西暗日去柱東侵反流開睿屬搦翰動神襟願託牢舟友長免愛

河深

奉和

王臺卿

朝光正晃朗踊塔標千丈儀鳳異靈烏金盤代仙掌積拱承一作彫

桷高簷挂珠網寶地若池沙風鈴如積響刻削生千變丹青圖萬象  
煙霞時出沒神仙乍來往晨霧半層生飛幡接雲上游蛻不敢息翔  
鷗詎能仰讚善資哲人流詠歸明兩願假舟航末彼岸誰云廣

奉和

庾信

迢迢陵太清照殿比東京長影臨雙闕高層出九城拱積行雲礙幡  
搖度鳥驚鳳飛如始泊蓮合似初生輪重對月滿鐸韻擬鸞聲畫水  
流全注圖雲色半輕露晚盤猶滴珠朝火更明雖連博望苑還接銀  
沙城天香下桂殿仙梵入伊笙庶聞八解樂方遣六塵情

夜望浮圖上相輪

梁簡文帝

光中辨垂鳳霧裏見飛鸞定用方諸水持添承露盤

賦詠五陰識支詩

澆淳混神因心形復依色欲浪逐情飄愛網隨心織鑄金雖改狀斬  
籌方未極鵠觀既無辯猿攀此焉息

賦詠百論捨罪福詩

劉孝綽

尋因途乃異及捨趣猶并苦極降歸樂樂極苦還生豈非輪轉愛皆  
緣封著情一知心相濁樂染法流清

蒙華林園誠詩

梁簡文帝

庸夫耽世樂俗士重虛名二空既難了八風恆易傾伊余久齊物本  
自一枯榮弱齡愛箕穎由來重伯成非爲樂肥遯特是厭逢迎執珪  
守蕃國主氣作元貞昔日書銀字久自慙宗英斯焉佩金璽何由廣  
德聲一作馨居高常慮缺持滿每憂盈茲言信非矯丹心良可明舟航  
奉睿訓接引降皇情心燈朗暗室牢舟出愛瀛是節高秋晚沈寥天  
氣清郊門光景麗祈年雲霧生紅蘂間青瑣紫露濕丹楹葉疎行徑

出泉溜遠山鳴綠衿依浦戍絳纓拂林征庶蒙八解益方便六塵輕  
脫聞時可去非恁捨重城

蒙預讖直疏詩

藝文作蒙預讖悔詩

皇情矜幻俗聖德愍重昏制書開攝受絲綸廣慧門時英滿君國一作

圓法侶盛天園俱銷五道縛共蕩四生怨一作冤三修一作循祛愛馬六

念靜心猿庭深林一作仗彩豔地寂鳥一作伎聲喧上風吹法鼓垂鈴鳴

畫軒新梅含未發落桂聚還翻早煙藏石墜寒潮浸水門一朝蒙善

誘方願遣籠樊

和太子讖悔詩

太子即簡文原本二句今依詩紀補全

梁武帝

玉泉漏向盡金門光未成繚繞聞天樂周流揚梵聲蘭湯沐身垢讖

悔淨心靈萎草獲再解落葉蒙重榮闕

奉和皇太子讖悔應詔

并序

王筠

奉和皇太子讖悔詩仍上皇宸極聖旨即疏降同所用十韻私心慶

躍得未曾有搗採餘韻更題鄙拙

一聖智比明帝德光四海荷負誠攸屬度脫實斯在讖說濟蒙愚推  
心屏欺詒名僧引定慧朝纓列元凱還迷依善導反心由真宰和鈴  
混吹音勝幡榮雪彩早蒲欲抽葉新篁向舒篋翹勲諒懇到歸誠信  
兼倍睿豔似煙霞欄干若珠琲善誘雖欲繼含毫愧文彩

講席將訖賦三十韻詩依次用

梁昭明太子

法苑稱嘉柰茲園羨脩竹靈覺相招影神仙共栖宿慧義比瑤瓊薰  
染等一作猶蘭菊理玄方十算功深似九築華水驚銀舟方衢列金軸

微言絕已久煩勞多累蓄因茲闡慧雲欲使心塵伏八水潤焦芽三  
明啓羣目寶鐸旦參差名香晚芬郁暫捨六龍駕微祛二鼠蹙意樹  
發空花心蓮吐輕馥喻斯滄海變譬彼菴羅熟妙智方縟錦深辭同  
霧縠善學同梵爪真言異銅腹逶迤合蓋城葳蕤布金郁珠華蔭八  
溪玉流通九谷青禽乍下上雲鴈飛翻覆高談屬時聽寡聞終自恣

日麗鴛鴦瓦風度蜘蛛屋落蔭散遠香霏雲卷遙族曠濟同象園中  
乘如佇獨後燄難堅明初心易驚縮應當離華水無令乖漆木投巖  
不足貴棘林安可宿器月希留影心灰庶方撲視愛同採蜂遊善如  
原菽八邑仙人山四寶神龍澳藥樹永繁稠禪枝詎凋撼以茲悅聞  
道庶此優馳逐願追露寶車脫屣親推轂

旦出興業寺講詩

梁簡文帝

沐芳肅朝帶駕言抵淨宮羽旗承去影繞吹雜還風吳戈夏服箭驥  
馬綠沈弓水照柳初碧煙含桃半紅由來六塵縛宿昔五纏矇見鶴  
徒知謬察象理難同方知恧四辯奚用語三空

和劉尚書侍五明集詩

藝文作和劉尚書侍講

梁元帝

帝德洽區宇垂衣彰太平黃唐慚懋實子姒恧嘉聲治家陳五禮功  
成奏六英汲引留宸鑒舟航動睿情諸王唯一法無生信不生因因  
從此見果果自斯明元良仰副后含一震鴻名龜藏踰啓筮魯史冠

春卿日宮佳氣滿月殿善風清綺錢蔽西觀緹幔卷南榮金門練朝  
鼓玉壺休夜更宮槐留曉合城烏侵曙鳴露光枝上動霞影水中輕  
虛薄今何事徒知戀法城

奉和昭明太子鍾山解講

并各和  
三首

陸倕

終南隣漢闕高掌跨周京復此虧天嶺穹隆距帝城當衢啓珠館臨  
下構山楹南望窮淮潏北眺盡滄溟步簷時中宿飛階或上征網戶  
圖雲氣龕室畫仙靈副君憐世網廣命萃人英道筵終後說鑾轡出  
郊坰雲峯響流吹松野映風旌睿心嘉杜若神藻茂琳瓊多謝先成  
敏空頒後乘榮

奉和

蕭子顯

嵩嶽基舊宇盤嶺跨南京叡心重禪室遊駕陟層城金輅徐旣動龍  
驂躍且鳴塗方後塵合地迴前笳清灑迤因臺榭參差憩羽旌高隨  
閱風極勢與元天并氣歇連松遠雪升秋野平徘徊臨井邑表裏見



淮瀛祈一作折果尊常住渴慧在無生暫留石山軌欲知芳杜情鞠躬  
荷嘉慶瞻道聞頌聲

奉和

劉孝綽

御鶴翔伊水策馬出王田我后遊祇鷺比事實光前翠蓋承朝景珠  
旗曳曉煙樓帳榮巖谷緹組曜林阡況在登臨地復及秋風年喬柯  
變夏葉幽澗潔涼泉停鑾對寶座辯論悅人天淹塵資海滴昭暗仰  
燈然法朋一已散笳劍儼將旋邂逅逢優渥託乘侶才賢擢辭雖並  
命遺恨獨終篇

奉和

劉孝儀

韶一作詔樂臨東序時駕出西園雖窮禮遊盛終爲塵俗喧豈如弘七

覺揚鸞啓四門夜氣清簫管曉陣爍郊原山風亂彩旄初景麗文轅  
林開兪騎騁逕曲羽旄屯煙壁浮青翠石瀨響飛奔迴情下重閣降  
道訪真源談空匹泉涌綴藻邁絃繁輕生逢過誤並作輦龍鶴顧已

同偏爵何用挹衢樽

廣弘明集卷第三十九

音釋

豐武斐切 豐不倦意也

罕音勞與罕同

驃毗召切 驃官名

頡頏頡奚切

頡頏頡奚切

頡頏頡奚切

椅宜於

切

蔚蒼蔚紆胃切 蔚蒼草木盛也

崢嶸崢仕切

崢嶸崢仕切

崢嶸崢仕切

蠖屋廓切

蠖尺蠖

櫟他各切 櫟擊櫟以宿衛之也

儕鈕佳切 儕輩也

禔常支切

撩魯皓切

搨昵角切

篋徒改切

篋竹萌也

藹為詭切 藹華榮也

滅色責切 滅隕落也

眊而志切 眊羽飾也

廣弘明集卷第四十

唐終南山釋道宣集

統歸篇第十之四

八關齋夜賦四城門詩

殿下即簡文帝時為皇太子中庶府君謂肩吾為太子中庶子

第一賦韻東城門病

梁庾肩吾等

伏枕愛危光痾纏生易折無因雪岸草慮反砒山穴徐防消渴腠腸腑

疼蹇嬰肢節如何促齡內憂苦無暫缺孔熹

南城門老

虛蕉誠易犯危藤復將嚙一隨柯已微當年信長訣諸葛已同白駒

去復類紅花熱妍容一旦罷孤燈行自設君

西城門死

緩心雖殊用滅景寧優劣一隨業風盡終歸虛妄設王臺五陰誠為

假六趣寧有截零落竟同歸憂思空相結李鏡

北城門沙門

俗幻生影空憂繞心塵曠於茲排四纏去矣求三涅殿下學輩流心

方從窈冥別已悲境相空復作泡雲滅中庶府君

第二賦韻東城門病

空痾誠易愈有病故難痊徒知餌五色終當悲九泉王臺卿已無雲山

草沈痲竟誰憐復悲淪苦海何由果淨天諸葛

南城門老

昔類紅蓮草自玩淥池邊今如白花樹還悲明鏡前殿下壯心欲何在

餘日乃西遷清罇不復樂蓬鬢豈還妍徐防

西城門死

高堂信逆旅懷業理常牽玉匣方委襯金臺不復延中庶府君挽聲隨逕

遠蘿影帶松懸詎能留十念唯應逐四緣君

北城門沙門

經行林樹下求道志能堅既有神通力振錫遠乘煙李鏡遠一登四弘

誓至道莫能先不貪曠劫壽無論延促年孔熹

### 第三東城門病

纏痾緬百年自傷無五福長榮畫篋蛇不值仙人鹿殿下習染迷畫瓶

臥起求栖宿羅襦豈再歡臨岐方土木中庶府君

### 南城門老

少年愛紈綺衰暮慙羅縠徒傷歲冉冉陳詩非郁郁王臺卿鶴髮辭軒

冕給背烹葵菽松柏稍相依歡愛時睦睦李鏡遠

### 西城門死

追念平生時遨遊土苑囿一沒松柏下春光徒儻昱孔熹結根素因假

枝葉緣骨肉自應螻蟻驅值此風刀逐諸葛曄

### 北城門沙門

俗繭厭纏絲因田抽善穀長披忍辱鎧去此讖羅服徐防願引三塗衆

俱令十使伏珠月猶沈首金罍未挑目君

### 第四東城門病

紫紉未可得漳濱徒再離一逢犬馬病賁育罷驅馳李鏡遠已無九轉

術復闕萬金奇不看授疆掌唯夢蓮花池君

### 南城門老

盛年歌吹日顧步惜容儀一朝衰朽至星星白髮垂孔熹已傷萬事盡

復念九門枝垂軒意何在獨坐鏡如斯中庶府君

### 西城門死

一息於今罷平生詎可規天長曉露促千齡誰復知殿下華堂一相捨

松帳杳難窺萬祀藏珠應千年罷玉羈徐防

### 北城門沙門

深心不可染正道亦難敵方除五欲累長辭三雅卮王少卿依空慮難

靜習善路猶彌汲身竟靡託單孟詎待貲諸葛

正月八日然燈詩應令

梁簡文帝

藕樹交無極華雲衣數重織竹能為象縛菘巧成龍落灰然藥威垂  
油濕畫峯天宮儻若見燈王願可逢

遊光宅寺詩應令

陪遊入舊豐雲氣鬱青葱紫陌垂青柳輕槐拂慧風八泉光綺樹四  
柱暖臨空翠網隨煙碧丹華共日紅方欣大雲溥慈波流淨宮

被幽迷志詩

并連珠三首○梁簡文於幽繫中援筆自序云有  
梁正士蘭陵蕭綱立身行己終始若一風雨如晦

鷄鳴不已非欺暗室豈況  
三光數至於此命也如何

恍忽煙霞散颼颼松柏陰幽山白楊古野路黃塵深終無千月命安  
用九丹金闕里長蕪沒蒼天空照心

十月弒於永福省年四十  
九崩崩時太清五年也

連珠三首

一曰吾聞有古富而今貧可稱多而賑寡是以度索數下獨有衰神  
松柏橋南空餘白社

二曰吾聞言可覆也仁能育物是以欲輕其死有德必昌兵踐於義無思不服

三曰吾聞道行則五福俱泰運閉則六極所鍾是以麟出而悲豈唯孔子途窮則慟寧止嗣宗

臨終詩

宋謝靈運

龔勝無遺生季業有窮盡嵇叟理既迫霍子命亦殞悽悽後一作霜

柏納納銜風菌邂逅竟無時一作幾何脩短非所愆恨我君子志不得巖

上泯送心正覺前斯痛久已忍唯願乘來生怨親同心朕

臨終遺表

梁沈約

臣約言臣抱疾彌留迄今卽化形神欲離月已十數窮楚極毒無言以喻平日健時不言若此舉刀坐劍比此爲輕仰惟深入法門厲茲苦節內矜外恕實本人情伏願聖心重加推厲微臣臨途無復遺恨雖慚也善庶等鳴哀謹啓



臨終詩禪藻集作法泰詩題之遺疾並誤

陳釋智愷

千月一作秋本難滿三時理易傾石火無恆焰電光非久明遺文空滿

笥徒然昧後生泉路方幽噎寒隴向淒清一隨朝露盡唯有夜松聲

入攝山栖霞寺并序一作再

陳江總

壬寅年十月十八日入攝山栖霞寺登崖極峭頗暢懷抱至德元年  
癸卯十月二十六日又再遊此寺布法師施菩薩戒甲辰年十月二  
十五日奉送金像還山限以時務不得恣情淹留乙巳年十一月十  
六日更獲禮拜仍停山中宿永夜留連棲神竦聽但交臂不停薪指  
俄謝率製此篇以記即日俾後來賞者知余山志

靜心抱冰雪暮齒迫一作逼桑榆太息波川迅悲哉人世拘歲聿皆採

穫冬晚具嚴枯濯流濟八水開襟入四衢茲山靈妙合當與天地俱

石瀨乍淺深崖煙遞有無缺碑橫古隧盤木臥荒途行行備履歷步

步麟一作麟歲紆高僧迹共遠勝地心相符樵隱各有得丹青獨不渝

寺猶有朗詮二師居士明  
僧紹洽中蕭跡塑圖像  
遺風佇芳桂比德喻生芻寄言長往客悽  
然傷鄙夫

至德二年十一月十二日升德施山齋三宿決定罪福懺悔詩  
四知無矯志二施啓幽心簡通避人物偃息還山林曲澗停騶響交  
枝落幔陰池臺聚凍雪欄牖噪歸禽石彩無新故峯形詎古今大車  
何杳杳奔馬遂駸駸何以修六念虔誠在一音未泛慈舟遠徒令願  
海深

五言攝山栖霞寺山房夜坐簡徐祭酒周尚書并同遊羣彥

江令公

澡身事珠戒非是學金丹月磴時橫枕雲崖宿解鞍梵宇調心易禪  
庭數息難石澗水流靜山牕葉去寒君思北闕駕我惜東都冠翻愁  
夜鍾盡同志不盤桓

仰同令君攝山栖霞寺山房夜坐六韻

徐孝克

戒壇青石路靈相紫金峯影進一作盡皈依鴿餐迎守護龍晨朝宣寶  
偈寒夜斂疎鍾鷄蘭靜含握仁智獨從容五禪清慮表七覺蕩心封  
願言於此處攜手屢相逢

同江僕射遊攝山棲霞寺

陳後主

時宰番溪心非關狎竹林鶯嶽青松曉鷄峯白日沈天迴浮雲細山  
空明月深摧殘枯樹影零落古藤陰霜村月一作夜烏去風路寒一作露

援吟自悲堪出俗詎是欲一作願抽簪

遊攝山棲霞寺

并序

江總

禎明元年太歲丁未四月十九日癸亥入攝山展慧布法師憶謝靈  
運集還故山入石壁中尋曇隆道人有詩一首十一韻今此拙作仍  
學康樂之體

靄霽時雨霽清和孟夏肇栖宿綠野中登頓丹霞杪敬仰高人德抗  
志塵物表三空豁已悟萬有一何小始終情所寄冥期諒不少荷衣

步林泉麥氣涼昏曉乘風面泠泠候月臨皎皎煙崖憩古石雲路排  
征鳥披逕憐森沈攀條惜杳裊平生忘是非朽謝豈矜矯五淨自此  
涉七塵庶無擾

靜臥栖霞寺房望徐祭酒

絕俗俗無侶修心心自齋連崖夕氣合虛宇宿雲羸臥藤新接戶  
敬石久成階樹聲非有意禽戲似忘懷故人市朝狎心期林壑乖  
惟憐對芳杜可以爲吾儕

仰和江令君

徐孝克

上宰明四空迴車八道中洞涼容麥氣巖光對月宮香來詎經火花  
散不隨風澗松無異聒禪桂兩分叢虛薄誠爲累何因偶會同暫此  
乖山北猶可向牆東

營渥槃讖

并序

禎明二年仲冬攝山栖霞寺布法師只爾待終余以此月十七日宿

昔入山仰爲師氏營涅槃懺還途有此作

可否同一貫生死亦一條況斯滅盡者豈是俗中要人道離羣愴冥  
期出世遙留連入澗曲宿昔涉巖椒石溜冰便斷松霜日自銷向崖  
雲鬢豔出谷霧飄颻勿言無大隱歸來卽市朝

庚寅年二月十二日遊虎丘山精舍

江總

縱棹憐迴曲尋山靜見聞每從芳杜性須與俗人分貝塔涵流動花  
臺偏領芬蒙籠出簷桂散漫繞牕雲情幽豈循物志遠易驚羣何由  
狎魚鳥不願屈玄纁江令公集云廬山遠法師未出家善弩射嘗於  
鶴窟射得鶴雛後復伺鶴母見將射之鶴不動  
翔觀之已死於窠中疑其愛子致死破視  
心腸皆寸絕法師於是放弩發菩提心

紀事

釋道宣

宋初有法瓊尼南方人不知因緣所出辟穀食棗栗不著綿帛戒德  
甚尊嚴禪定多所感通會稽恭子張使君莅廣州便供養之隨使君  
還吳又隨出入尼自尅亡日捨命後勿棺殮但以乞烏爲至破崗如

期而終使君依旨送林野間停再七日七夕鳥獸不敢侵乃收殯焉  
亡祖親使君之第四女也就瓊尼受戒勅余記錄之

往虎窟山寺詩

并和五首○詩紀考藝文此詩簡文帝作所載玉問諸臣和詩可證言此集作江令詩蓋有脫

簡素  
誤爾

塵中喧慮積物外衆情捐茲地信爽愷墟壘暖阡綿藹藹車徒邁飄  
飄旌旆懸細松斜繞逕峻嶺半藏天古樹無枝葉荒郊多野煙分花  
出黃鳥挂石下新泉蒼鬱均雙樹清虛類八禪栖神紫臺上縱意白  
雲邊徒然嗟小藥何由齊大年

奉和

王罔

美境多勝迹道場實茲地造化本靈奇人功兼製置房廊相映屬堦  
閣並殊異高明留睿賞清淨穆神思豫遊窮領歷藉此芳春至野花  
奪人眼山鶯紛可喜風景共鮮華水石相輝媚像法無塵染真僧絕  
名利陪遊既伏心聞道方刻意

奉和

陸罩

鷄鳴動睟駕柰苑睠晨遊朱鑣陵九達青蓋出層樓歲華滿芳岫虹  
彩被春洲葆吹臨風遠旌羽映光浮喬枝隱脩徑曲澗聚輕流徘徊  
花草合瀏澆鳥聲道金盤響清梵涌塔應鳴杼慧雲方靡靡法水正  
悠悠實歸徒荷教信解愧難訓

奉和

孔燾

聖情想區外脂駕出西南前驅聞鳳管後乘躍龍驂爰遊非逸豫幽  
谷有靈龕兼覲息心者宴坐臨清潭禪食寧須椽雲衣不待蠶蘋苻  
緣澗壑羅葛蔓松楠鶯林響初囀春畦藥欲含惑心隨教遣法味與  
恩覃庶憑八解力永滅六塵貪

奉和

王臺卿

我王宗勝道駕言從所之輜軒轉朱轂驪馬躍青絲清渠影高蓋遊  
樹拂行旗賓徒紛雜沓景物共依遲飛梁通澗道架宇接山基叢華

臨迴砌紛流繞曲墀誰言非勝境雲山獨在茲塵情良易著道性故  
難緇承恩奉教義方當弘受持

奉和

鮑至

神心睠物序訪道絕塵囂林疎蓋影出風去管聲遙息徒依勝境稅  
駕止山椒年還節已仲野綠氣方韶短葉生喬樹疎華發早條遠峯  
帶雲沒流煙雜雨飄復茲承乏者頒名廁末僚願藉連阿澗庶影慧  
燈昭一知依內寶方慚一作悲茲地遼

春日從將軍遊山寺

集原作陳從事何處士今從詩紀

陳從事

蘭庭厭俗賞柰苑矚年華始入香山路仍逢火宅車慈門數片葉道  
樹一林華雖悟危藤鼠終悲在篋蛇

別才法師於湘還郢北

乘杯事將遠捧袂忽無聊南楚長沙狹西浮郢路遙離亭華已散別  
戍馬新驕明日分千里相思非一條



敬訓解法師所贈

道林俗之長

一作表

慧遠廬之阿買山卽高世乘杯且渡河法雨時時

落香雲片片多若爲將羽化來濟在塵羅

通士人篇

龍宮旣入道鳳闕且辭榮禪龕入想淨義窟四塵輕香蓋法雲起華  
燈慧火明自然忘有著非止悟無生

從遊天中天寺應令

陳沈炯

福界新開草名僧共下筵楊枝生拱樹錫杖呪飛泉石座應朝講山  
龕擬夜禪當非舍衛國賣地取金錢

同庾中庶肩吾周處士弘讓遊明慶寺

鷲嶺三層塔菴園一講堂馴烏逐飯磬狎獸繞禪牀摘菊山無酒然  
松夜有香幸得同高勝於此瑩心王

從駕經大慈照寺詩

并序

北齊盧思道

皇帝以上徽統天大明御極彈壓九代驅駕百王至德上通深仁下  
漏威稜西被聲教東漸布政合宮考儀太室張樂洞野會計苗山天  
不愛寶神靡遺貺鱗羽郊異山澤薦祉華裔率從幽顯咸秩八政惟  
序六府告平猶且棲志宵冥凝神空寂俯陋區域顧遺形有救精民  
於苦器拯欲界於危城身心澄淨樂之境生靈仰調御之力中宮厚  
德載物正位儷天道冠邵陵業踰藝妣慧雲朝起四生佇其寸合慈  
燈夜爇九服照其餘光乃睠參墟實唯唐舊山川周衛襟帶巖峒東  
郊勝地爰構寶坊儼若化城瞬如踊出旣而景躔西陸氣中南呂商  
飈振野白露威寒聖主御辯巡方順時育物六龍進駕七聖齊軫翠  
旗揚旆雕玉徐輪問百年而拜輦朝萬靈以按節熊渠攸飛之輦入  
參中壘虎殿金門之侶迴望屬車將屆下都邁茲淨域兼悅鷺山之  
觀共喜龍宮之遊接足栖心俱展誠敬課虛引寂仍發詠歌雖事比  
擊轅義同叩角亦以雍容盛烈述讚休美豈若皋朔文辭甫陳男祝

王谷蟲篆纔譬女工作者二十六人其詞云爾

玄風冠東戶內範軼西陵大川開寶匣福地下金繩繡栢高可映畫  
拱疊相承日馭非難假雲師本易憑陽室疑停燧陰軒類鑿冰迴題  
飛星沒長楣宿露凝旌門曙光轉輦道夕雲蒸山祇効靈物水若薦  
休徵薄命叨恩紀微軀竊自陵優游徒可恃周賚永難勝

五苦詩

周釋亡名

生苦

可患身爲患生將憂共生心神恆獨苦寵辱橫相驚朝光非久照夜  
燭幾時明終成一聚土強覓千年名

老苦

少時欣日益老至苦年侵紅顏旣罷豔白髮寧久吟階庭唯仰杖朝  
府不勝簪甘肥與妖麗徒有壯時心

病苦

拔劍平四海橫戈却萬夫一朝牀枕上迴轉仰人扶壯色隨肌減呻  
吟與痛俱綺羅雖滿目愁眉獨向隅

死苦

可惜凌雲氣忽隨朝露終長辭白日下獨入黃泉中池臺既已沒墳  
隴向應空唯當松柏裏千年恆勁風

愛離

誰忍心中愛分爲別後思幾時相握手嗚噎不能辭雖言萬里隔猶  
有望還期如何九泉下更無相見時

五感陰

先去非長別後來非久親新墳將舊冢相次似魚鱗茂陵誰辯漢驪  
山詎識秦千年與昨日一種併成塵定知今世土還是昔時人焉能  
取他骨復持埋我身

遊明慶寺詩

遇見蕭祭酒書明慶寺禪房詩覽  
之愴然憶此寺仍用蕭韻述懷

陳姚察

地靈居五淨山幽寂四禪月宮臨鏡石華潛繞峯蓮震暉間旛影雲  
氣合鑪煙迴松高偃蓋水瀑細分泉含風萬籟響裊露百華鮮宿昔  
尋真趣結友亟留連山庭出藿靡澗沚濯潺湲因斯事熏習便得息  
攀緣何言遂雲雨懷此悵悠然徒有南登望會逐東流旋

詠懷詩三首

陳張君祖

運形不標異澄懷恬無欲座可栖王侯門可迴金轂風來詠逾清鱗  
萃淵不濁斯乃玄中子所以矯逸足何必翫幽閑青衿表離俗百齡  
苟未遐昨辰亦非促曦騰望舒映曩今迭相燭一世皆逆旅安悼電  
往速區區雖非黨兼忘混礫玉恪神罔叢穢要在夷心曲

又

靈鷲起回浪飛雲騰逆鱗苟擢南陽秀固集三造賓緬懷結寂夜味  
藻詠終晨延佇時無邁誰與拂流塵眇情寄極眇蕭條獨傲神相忘  
東溟裏何晞西朝津我崇道無廢長謠想義人

又

遙逐播荆衡杖策憩南郢遭動倭浪迹遇靖恬夷性撫卷從老話揮  
綸與莊詠遐眺獨緬想蕭神飈塵正時無喜惠偶絕韻將誰聽習一作  
君子茂芳標有欣徽音令穎顛陵霜倩葩熙三春威拂翮期霄翔豈  
與桑榆競我混不材姿遺情忘彫映雖非嶧陽椅聊以翮泗磬

贈沙門竺法頽三首

并序

沙門竺法頽遠還西山作詩以贈因亦嘲之省其二經聊爲之讚頽

切倫

鬱鬱華陽岳絕雲抗飛峯峭壁溜靈泉秀嶺森青松懸巖廓崢嶸幽  
谷正寥籠丹崖栖奇逸碧室禪六通泊寂清神氣綿眇矯妙蹤止觀  
著無無還淨滯空空外物豈大悲獨往非玄同不見舍利弗一作佛受

屈維摩公

又

至人如影響靈慧陶億劫應方恢權化兆類蒙慈悅冥冥積塵昧永  
在巖底閉廢聰無通照遺形不洞滅明哉如來降豁矣啓潛穴幽精  
淪朽壤孰若阿維察遙謝晞玄疇何爲自矜潔

又

邈邈慶城標峨峨浮雲嶺峻蓋十二嶽獨秀閭浮境丹流環方基瑤  
堂臨峭頂澗滋甘泉液崖蔚芳芝穎翹羨化倫眇眇陵崖正肅拱  
望妙覺呼吸晞齡永苟能夷冲心所憇靡不淨萬物可逍遙何必栖  
形影勉尋大乘軌練神超勇猛

道樹經讚

峨峨王舍國鬱鬱靈竹園中有神化長空觀體善權私呵晞光景豈  
識真迹端恢恢道明玄解發至神歡飄忽凌虛起無云受慧難

三昧經讚

迹超十二燒戒由三昧成賢行極妙住道志慧以明九本旣殊動四

禪不同冥淵哉不起滅始自無從生借問道氣倫安測泥洹靈

代答張君祖

并序

陳庾僧淵

省贈法頽詩經通妙遠疊疊清綺雖云言不盡意殆亦幾矣夫詩者志之所之意迹之所寄也忘妙玄解神無不暢夫未能冥達玄通者惡得不有仰鑽之詠哉吾想茂德之形容雖栖守殊塗標寄玄同仰代答之未足盡美亦各言其志也其辭曰

真朴運既判萬象森已形精靈感冥會變化靡不經波浪生死徒彌綸始無名捨本而逐末悔吝生有情胡不絕可欲反宗歸無生達觀均有無蟬蛻豁朗明逍遙衆妙津栖凝於玄冥大慈順變通化育曷常停幽閑自有所豈與菩薩并摩詰風微指權道一作道多所成悠悠滿天下孰識秋露情

答庾僧淵

張君祖

茫茫混成始豁矣四天朗三辰環須彌百億同一像靈和陶氤氳會



之有妙長一作常大慈濟羣生冥感如影響蔚蔚沙彌衆粲粲萬心仰  
誰不欣大乘兆定於玄曩三法雖成林居士亦有黨不見虬與龍灑  
鱗凌霄上沖心超遠寄浪懷邈獨往衆妙常所晞維摩余所賞苟未  
體善權與子同髯髻悠悠誠滿域所遺在廢想

又答張君祖

庾僧淵

遙望華陽嶺紫霄籠三辰瓊巖朗壁室玉潤灑靈津丹谷挺樛樹季  
穎奮暉薪融飈衝天籟逸響互相因鸞鳳翔迴儀虬龍灑飛鱗中有  
沖漠士眈道玩妙均高尙疑玄寂萬物息自賓栖峙遊方外超世絕  
風塵翹想晞眇蹤矯步尋若人咏嘯舍之去榮麗何足珍濯志八解  
淵遼朗豁冥神研幾通微妙遺覺忽忘身居士成有黨顧眄非疇親  
借問守常徒何以知反真

遊方山靈巖寺詩

隋煬帝

梵宮旣隱隱靈岫亦沈沈平郊送晚日高峯落遠陰迴旛飛曙嶺疎

鐘響畫林蟬鳴秋氣近泉吐石谿深抗迹禪枝地發念菩提心

奉和方山靈巖寺應教

隋諸葛穎

名山鎮江海梵宇駕風煙畫栱臨松蓋鑿牖對峯蓮雷出階基下雲  
歸梁棟前靈光辨晝夜輕衣數劫年一陪香作食長用福爲田

正月十五日於通衢建燈夜升南樓

隋煬帝

法輪天上轉梵聲天上來燈樹千光照華燄七枝開月影凝流水春  
風含夜梅旛動黃金地鍾發瑠璃臺

奉和通衢建燈應教

諸葛穎

芳衢澄夜景法炬爛參差逐輪時徙燄桃華生落枝飛煙繞定室淨  
光映瑤池重閣登臨罷歌管乘空移

捨舟登陸示慧日道場玉清玄壇德衆

隋煬帝

天淨宿雲卷日舉長川日颯灑林華落逶迤風柳散孤鶴近追羣啼  
鶯遠相喚蓮舟水處盡畫輪途始半江澹各自遙東西並興歎已熏

禪慧力復籍金丹捍有異二川遊曾非四門觀於焉履妙道超然登  
彼岸

臥疾閩越述淨名意

并序

隋王胄

余臥疾閩海彌留旬朔善友顒法師勸余以淨名妙典調伏身心力  
疾粗陳其意敬簡法師云爾

客行萬餘里渺然滄海上五嶺常炎鬱百越多山瘴兼以勞形神遂  
此嬰疲恙桐雷邈已遠砭石良難訪抱影私自憐霑襟獨惆悵毗城  
有長者生平夙所尚復藉大因緣勉以深迴向心路資調伏於焉念  
實相水沫本難摩乾城空有狀是生非至理是我皆虛妄求之不可  
得誰其受業障信矣大醫王茲力誠一作難無量

展敬上鳳林寺

隋薛道衡

淨土連幽谷寶塔對危峯林栖丹穴鳳地邇白沙龍獨巖樓迴出複  
道閣相重洞開朝霧斂石濕曉雲濃高篠低雲蓋風枝響和鐘簷陰

翻細柳澗影落長松珠桂浮明月蓮座吐芙蓉隱淪徒有意心迹未  
相從

奉和武帝三教詩

梁釋智藏

心源本無二學理共歸真四執迷叢藥六味增苦辛資緣良雜品習  
性不同循至覺隨物化一道開異津大士流權濟訓義乃星陳周孔  
尚忠孝立行肇君親老氏貴裁欲存生由外身出言千里善芬爲窮  
世珍但空非卽有三明似未臻近識封岐路分鑣疑異塵安知悟云  
漸究極本同倫我皇體斯會妙鑒出機神眷言總歸轡迴照引生民  
顧惟慚宿殖邂逅逢嘉辰願陪入明解歲暮有攸因

遊并州大興國寺詩

唐太宗

迴鑾遊福地極目翫芳晨梵鐘交二響法日轉雙輪寶刹遙承露天  
華近足春未佩蘭猶小無絲柳尚新圓光低月殿碎影亂風筠對此  
留餘想超然離俗塵

詠興國寺佛前幡

拂霞疑電落騰虛狀寫虹屈伸煙霧裏低舉白雲中紛披乍依迴掣  
曳或隨風念茲輕薄質無翅強搖空

遊大慈恩寺詩

并和○一作太宗

日宮開萬一作百仞月殿聳千尋華蓋飛團一作圓影幡虹曳曲陰霞綺

遙籠帳叢珠細網林寥廓煙雲表超然物外心

和

慈恩寺沙門

皇風扇祇樹至德茂禪林仙華曜日彩神幡曳遠陰綺殿籠霞影飛  
閣出雲心細草希慈澤恩光重更深

奉和寶使君同恭法師詠高僧二首

竺佛圖澄

唐釋僧宣

大誓憫塗炭乘機入生死中州法既弘葛陂暴亦止乳孔光一室掌  
鏡徹千里道盛况蓮華災生吟棘子埋石緣雖謝流沙化方始

釋僧肇

般若唯絕鑿涅槃固無名先賢未始覺之子唱希聲秦王嗟理詰童  
壽揖詞清徽音聞廬岳精難動中京適驗方袍裏奇才復挺生

秋日遊東山寺尋殊曇二法師

木落樹蕭慘水流瀟寂屬此悲哉氣復茲羈旅感奚用寫煩憂山  
泉恣遊歷萬丈窺深澗千尋仰絕壁傍嶺竹參差緣崖藤羃歷行行  
極幽邃去去逾空寂果值息心侶喬枝方挂錫圍遶悉旃檀純良豈  
沙礫妙法誠無比深經解怨敵心歡卽頂禮道存仍目擊慧刀幸已  
逢疑網於焉析豈直祛煩惱方期拯沈溺

廣弘明集卷第四十

音釋

